

**NATIONAL ASSEMBLY OF
SEYCHELLES**

Monday 15th December 2025

The Assembly met at 9am

National Anthem

Moment of Reflection

Madam Speaker in the Chair

MADAM SPEAKER

Mon a dir bonzour tou bann Manm. Bonzour tou dimoun ki pe ekout nou. E bann ki pe swiv nou *live*. Parey zot vwar, sa semenn nou'n met lo nou *Order Paper* ki nou pou sit tou le zour Lendi ziska Vandredi. E alors nou annan en kantite travay pou nou fer. Mon ava demann Clerk pou fer *Presentation of Papers*.

MADAM CLERK

Bonzour Madam Speaker. Mersi Madanm. Bonzour tou bann Manm, tou bann *staff* Lasanble. Tou dimoun a lekout. Bann papye ki pe ganny prezante c' est matin i:
S.I 95 of 2025 – 4.6% Seven Year Treasury Bond Debt Order, 2025.

S.I 96 of 2025 – Social Security (Benefits) (Amendment) (No. 2) Regulations, 2025.

S.I 97 of 2025 – Notice to repeal the dangerous Wrecks Notice, 2025.

S.I 98 of 2025 – The Court of Appeal of Seychelles (Amendment) Rules 2025. Mersi Madanm Speaker.

MADAM SPEAKER

Mersi Clerk. Nou ava aprezan bouz lo 5enm *item* lo *Order Paper*. Nou ava fer sa *First Reading Supplementary Appropriation Bill* please.

MADAM CLERK

Mersi Madam Speaker. *This Act may be cited as the Supplementary Appropriation Act, 2025.* Mersi Madanm Speaker.

MADAM SPEAKER

Mersi. Nou pou aprezan bouz lo *Second Reading Cybercrime and Other Related Crimes (Amendment) Bill*. Mon ava demann sekretarya pou fer Vis-Prezidan ek son lekip antre dan *Chamber* silvouple.

Bonzour Vis-Prezidan avek ou lekip. Mon ava demann en Mosyon pou *Second Reading*. Onorab Lemiel?

HON SYLVANNE LEMIEL

Mersi Madanm Speaker. Bonzour Madanm Speaker. Tou koleg Manm Onorab, VP avek ou delegasyon, tou dimoun a lekout Bonzour. Madanm Speaker, anba 69(2), mon demande ki *Bill* limero 22 pou lannen 2025 i ganny lir pou en Dezyenm Fwa. Mersi.

MADAM SPEAKER

Mersi. Onorab Gill.

HON CHURCHILL GILL

Mersi Madanm Speaker. Bonzour Madanm Speaker. Bonzour VP ek ou delegasyon. Bonzour tou Manm e tou dimoun ki pe ekout nou. Mosyon i segonde. Mersi.

MADAM SPEAKER

Mon ava demann Vis-Prezidan pou fer prezantasyon lo *Cybercrime and Other Related Crimes (Amendment) Bill* silvouple.

VICE-PRESIDENT SEBASTIEN PILLAY

Bonzour Madanm Speaker. Bonzour Leader Lopozisyon. Leader Zafer Gouvernman. Tou Manm Onorab. E bonzour tou dimoun ki a lekout. I fer mwan en plezir Madanm Speaker pou prezant *Cybercrime and Other Related Crimes (Amendment) Bill, 2025*, ki en lamannman lo

en Lalwa ki nou ti pase oparavan.

Avan mon konmanse mon ti a kontan prefase ki sa Lalwa i en *benchmark* enportan pou pei, akòz sa bann lamannman i pa zis bann amannman ki Gouvernman pe propoze. Bann lamannman ki pe ganny propoze lo en fason pli larz, par Konsey Lerop an sa ki konsern management oubyen dil avek bann size *cybercrime* ek bann *Other Related Crimes* anba Lalwa egzistan.

In annan apre bann analiz ki'n ganny fer, plizyer *gaps* ki'n ganny etabli anba Lalwa aktyel. E prezan in annan en nesesite pou fer serten lamannman avek Lalwa egzistan. Mon ava pas dan premir sa bann lamannman. Mon konnen i pou annan plizyer kestyon an sa ki konsern sa bann lamannman.

E nou ava sey nou mye pou adres sa bann kestyon pandan *Committee Stage*. E menm adres bann kestyon ki bann Manm i kapab souleve pandan deba. Mon bezwen osi dir Madanm Speaker, ki sa lamannman in ganny laprouvasyon tou lede *Cabinet*. Savedir *Cabinet* sortan e *Cabinet* presedan.

Alors, mon ekspekte ki mon ganny en *buy in* Lasanble

Nasyonal dan son antyerte ozordi bomaten. Madanm Speaker, sa lamannman avek nou *Cybercrime and Other Related Crimes 2021* i enn ki nesaser pou fer sir ki nou Lalwa i reflekte bann bon pratik enternasyonal an sa ki konsern *cybercrime*.

E osi an sa ki konsern bann konvansyon enternasyonal ki pei i form par ladan. Madanm Speaker, le 22 Novanm 2021, Lasanble Nasyonal ti vot lo an faver *Cybercrime and Other Related Crimes Bill, 2021*. Sa ki ti ranplas *Computer Misuse Act, 1998*. In enn ki kapab adres bann eleman ki pa kler ou menm pa ti ganny kouver anba *Computer Misuse Act 1998*.

Avek sa Lalwa Sesel ti zwenn bokou lezot pei dan sa lalit kont bann krim nimerik. I enportan note Madanm Speaker, ki sa bann lamannman ki devan nou ozordi i an rezilta pa zis rekomandasyon e revi par *Council of Europe*. Me osi bann revi ogmantasyon bann eksper legal sorti kot *World Bank* e Biro *Attorney Zeneral* Sesel.

Ler mon koz lo *World Bank* Madanm Speaker, a sa pwen mon bezwen met devan Lasanble ki en parti bann finansman e sipor bidzeter ki

nou gannye avek *World Bank*, sa *Bill* i form par enn bann benchmark ki nou bezwen zwenn. Alors, i annan en serten irzans pou Lasanble Nasyonal dil avek sa Prozedlwa ozordi.

Letan Lapolis Sesel i sa antite ki annan sa manda pou enplimant sa Lalwa, zot in osi enn bann antite lokal ki'n ede kontribye dan sa revi. Madanm Speaker, i enportan pou note ki i annan lezot laspe sa Lalwa ki mon pou vin lo la apre an sa ki konsern *cyber profiling*.

E son konotasyon ki i annan pou nou ozordi, e ki kantite resours ki nou bezwen adisyonnelman pou nou met an plas pou nou kapab fer laplikasyon sa Lalwa dan son antyerte. Madanm Speaker, krim dan lespas nimerik napa en baryer an term ziridiksyon. Alors, sa konba kont bann krim nimerik i enn ki global.

Sak pei i bezwen fer son par dan sa batay pou asire ki i annan Lalwa ki dekrir klèman bann lofans kriminel nimerik pou protez nou bann sitwayen. E fer ki zot annan konfyans dan bann sistenm nimerik. Pou nou Sesel sa i ekstrememan enportan.

Madanm Speaker, bann tel Lalwa e zot lenplimantasyon aktiv i alors reste pilye dan demars transformasyon

nimerik sak pei. Parey zot a konnen Sesel pe anbank li dan en transformasyon nimerik. E plis ki nou al ver en transformasyon nimerik, i pou nesese pou nou kapab protez nou bann sistenm an plas.

An se moman, en bann trete enternasyonal ki'n inisye bann kad legal an sa ki konsern bann Lofans Krim Nimerik, zot lenvestigasyon e korporasyon enternasyonal se konvansyon *Budapest* lo krim nimerik par Konsey Lerop.

Madanm Speaker, mon pou donn detay lo serten sa bann sanzman kle ki pe ganny propoze dan sa Lalwa. Dan Seksyon 2 i annan lamannman en definisyon, en lentrodiksyon 6 nouvo definisyon pou fer sir ki bann mo e terminoloji i byen ganny definir pou zot konteks dan sa Lalwa.

E pou osi asire ki i annan konsistans en pli bon konprenezon sa Lalwa. Dan Seksyon 3 i annan lentrodiksyon en nouvo provizyon ki asire ki nou Lalwa i osi aplikab pou bann Seselwa ki komet bann tel lofans anba sa Lalwa dan en lot pei.

A sa pwen Madanm Speaker, mon bezwen note ki ler nou annan bann kad legal ki *across* bann diferan ziridiksyon e armonize i fer li pli fasil pou sa

konsep *Neutral Legal Assistance* dan lesans sa ki en lot pei i kapab demann Sesel lasistans legal pou en krim ki'n arive dan zot pei akòz sa i fer ki sa krim dan sa pei osi i en krim dan ou pei Sesel.

Nou annan en eleman reposit ki'n ganny respekt, pou fer ki nou osi nou onor bann langazman enternasyonal e korperasyon ki nou annan enternasyonalman. Sa Madanm Speaker, i prenon kont laplikasyon lanvironnman elektronik kot en endividi i kapab komet sa bann lofans a okenn lokasyon otour lemonn.

Se pou sa rezon ki armonizasyon bann Lalwa ki konsern bann krim ki konsern bann sistenm labaz nimerik i nesese ganny fer. I nesese ki Sesel osi i swiv sa parkour pou anmenn sa evolisyon dan bann Lalwa ki nesese ganny met an plas.

Madanm Speaker, i enportan note ki pou seksyon 13(13), (14), (15), (16) e (18) sa bann seksyon pa ti reflekte okenn provizyon dan *Budapest Conventions*. Me koman en nasyon nou'n war nesese enkli sa bann provizyon. Sa bann lamannman dan sa bann seksyon pe ganny sizere pou asire ki sa bann seksyon pa vyol

okenn drwa bann endividi pou eksprim zot lekor libremen.

Me pou anpese ki i annan okenn mal enterpretasyon sa bann seksyon. Madanm Speaker, a sa pwen mon bezwen ankor enn fwa note ki nou laliberte lekspresyon i osi ganny kondisyonnen par lafason ki nou servi bann sistenm atraver nou pratik nou laliberte lekspresyon.

Seksyon 17 in ganny amande Madanm Speaker, ki fer ki aprezan en lofans pou menm distribye ou transmet okenn materyo obsenn ou pornografi ki enplik sirtou bann zanfan. A sa pwen osi Madanm Speaker, mon oule note ki malgre i annan bokou zefor ki'n ganny fer dan sa konteks in toultan reste en defi pou fer ki bann provizyon santans e konsekans bann tel aksyon i ganny armonize otour lemonn.

Sirtou an sa ki konsern Sesel, nou'n sey rod fason pou vwar ki bann lofans e ki bann penalti ki pou asosye avek sa bann krim. Mon note ki Sesel in resaman ganny en krim parey. E ki nou bezwen met an plas bann mezir pou fer ki bann dimoun ki pratik pornografi kont ou zanfan, i ganny pinisyon ki Lalwa i kapab prekonize.

La kot in annan serten sanzman. Oparavan kot sa lofans ti pou annan i annan en dimoun ki fer en lofans anba sa provizyon Lalwa ti kapab ganny kondannen pou ziska 5an. Sa in ganny ogmante prezan pou vin 10an. Sa i ava anliny avek *deterrent* ki nou oule met an plas pou okenn dimoun ki pratik oubyen al ver fer tel aktivite an servan bann sistenm nimerik.

Seksyon 19(a) madanm Speaker, i en nouvo seksyon ki kriminaliz bann lofans anver drwa doter. Sa i en provizyon dan *Budapest Convention*, e asir proteksyon nesese pou bann drwa doter. I nesese pou annan sa bann provizyon madanm Speaker, aköz nou konnen *copy right tech* i en keksoz ki *prevalent* dan lemonn.

E pou asire ki Sesel koman en ziridiksyon i protez nou kont bann dimoun ki kapab vin isi e pratik sa bann kalite aktivite, san ki i ava annan en konsekans legal pou zot. Seksyon 19(b) i osi en nouvo seksyon ki fer li vin en lofans pou okenn endividi ki seye asiste e partisip dan okenn sa bann lofans ki'n ganny kriminalize anba sa Lalwa.

Sa Madanm Speaker, i pou asire ki sa bann endividi i

pran responsabilite zot aksyon. E sa osi i pou ede dan lalit kont *Cybercrime*. Rezon det deryer sa i senp Madanm Speaker, se ki si en dimoun li i napa sa konpetans nimerik oubyen teknik pou li kapab fer sa bann aktivite.

Okenn dimoun ki asiste li dan fer sa bann aktivite, i osi komet en lofans. E alors li osi i kapab ganny penalize anba sa Lalwa. Seksyon 19(c) Madanm Speaker, i en nouvo seksyon ki fer ki bann dimoun legal, bann personn legal parey Lalwa i prekonize anba nou *Interpretation and General Provisions Act*, tel koman bann konpannyen ki'n ganny anrezistre, i kapab ganny vwar koupab pou en lofans anba sa Lalwa.

Sa osi Madanm Speaker, se pou osi asire ki sa bann legal personn i osi pran responsabilite pou zot aksyon ki nou annan okenn kontribisyon dan okenn lofans ki'n ganny kriminalize anba sa Lalwa. Zisteman Madanm Speaker, sa i enportan pou protez nou ziridiksyon kont okenn endividi ki'n form en konpanny ki kapab servi nou ziridiksyon petet an realiz an ki petet Sesel napa sa konpetans *requisite* pou li fer aksyon lenvestigasyon oubyen pou

etablir lofans ki zot in kree pou nou kapab dil ek sa sityasyon e en *deterrent* kler.

Ler nou lans sa mesaz avek nou bann partner aletranze, e fer li osi posib pou zot demann nou lasistans legal otour sa bann *case*. Sa i en size ki nou pe adrese koman Gouvernman, aköz bann *request from mutual legal assistance* i enn ki ekstrememan enportan. Madanm Speaker, bann lamannman ki annan pou fer ek seksyon (20), (23) e (24) i an relasyon avek bann lenvestigasyon loperasyon ki ganny antreprann par bann zofisye lapolis.

An partikilye sa bann lamannman i aprezan rekonnet e permet koleksyon okenn levidans nimerik pou okenn lezot lofans kriminel anba lezot Lalwa. I enportan pou fer kler avek Lasanble Madanm Speaker, ki souvandfwa i pa sa sistenm li menm ki a labaz sa lofans. Me lafason ki sa teknolozi i ganny servi.

Se pou sa rezon ki nou bezwen rod fason pou nou protez dimoun kont bann latak ki sa teknolozi i kapab ganny servi. Par egzanp Madanm Speaker, si ou annan en sistenm nimerik ki pe *store* lenformasyon lo en endividi

kelkonk lo okenn Onorab la anndan, a sa moman ki sa lenformasyon pe ganny store napa problem.

Me dek koman en dimoun i sey kas bann proteksyon ki ganny mete otour sa Lalwa, mon pe sey fer li pli senp posib pou ki tou dimoun i kapab konpran. Sa i vin en lofans. E si sa dimoun i annan lentansyon servi sa lenformasyon pou afekte sa dimoun ki sa lenformasyon i pou li. Oubyen servi sa lenformasyon pou en gen personnel, sa i vin en krim pou ki sa dimoun i kapab *reliable* e ganny pini.

Madanm Speaker, i enportan pou nou regard avek sa ki pe pase dan lemonn. Evolisyon nimerik i inevitab ki nou bezwen vwar bann lamannman dan bann provizyon legal ki egziste otour nou. E zis avek sa konteks ou bezwen osi regard bann keksoz ki fer ki nou bezwen sanze.

E pou nou kapab vin pli compliant koman en pei. Mon'n pas dan bann diferan seksyon pou montre ki mannyer nou annan bann diferan eleman dan sa bann seksyon ki kler pou ki nou konpran konman en Lasanble ki nou pe fer ozordi bomaten. E ki nou regard bann lezot size.

Mon konnen ki pandan deba i pou annan size otour *AI*, *deepfake* bann lezot size ki konsern bann lezot aksyon nimerik ki kontinyen sanze. Sa ki Lasanble i bezwen konpran, e mon krwar i difisil. Me ler ou komans enterakte avek sa bann provizyon legal ou komans war difikilte ki annan.

Se ki evolisyon dan sa sektor i enn ki ekstrememan dinamik. Ler ou krwar ozordi ou kapab swiv sa ki pe pase, demen i annan en lot keksoz ki *come up* e ou kapab swiv. E ou bezwen ankor enn fwa fer bann lamannman pou kapab oubyen rod ankor bann provizyon pou kapab fer fas avek sa.

Sa ki osi nou bezwen fer, se ki nou bezwen regard en lot laspe sa bann krim ler i arive. E sa ti son laspe psikolojik. Madanm Speaker, ozordi nou problem ki nou annan se ki *profiling* bann dimoun ki fer bann krim atraver *cyber* i baz en kantite lo bann *digital artifacts*, bann *source of intelligence*. Oubyen bann rapor ki bann viktim i anmennen.

Savedir, mon kont in ganny vyole, enn mon lenformasyon in ganny pran si mwan ki al devan. *Ok*. Me sa ki enteresan Madanm Speaker, se la kot problem i reste se ki bann dimoun ki komet sa bann

lofans zot toultan aplik en striktir ki gard zot anormalite.

Savedir zot kapab asire ki zot lidantite i kapab ganny kasyet. Zot servi bann diferan *tools*, zot servi bann *false* personnaz par egzanp an sa ki konsern *Facebook* kot zot servi pou lour bann zenn pou vin fer serten aktivite. Savedir zot servi bann *fake profile*. E prezan i annan bann *gaps* ki egziste *across* bann diferan ziridiksyon ki fer ki ou pa kapab etabli en kontinyite dan lenvestigasyon.

Sa i osi fer ki ou pa kapab etabli byen bann pti *behavior* ki sa bann dimoun i annan. E ler ou koz avek bann eksper dan *forensic phycologist*, sa ki zot pou dir ou se ki ou bezwen prezan al ver en restriksyon akse avek serten platform ki prezan la i vin en problem konstitisyonnel, aköz ou pe restrikte akse avek teknolozi.

Madanm Speaker, en lot keksoz ki en problem pou nou pei. E sa i an relasyon avek bann krim sirtou ki kapab ganny komet anba sa Lalwa. E sa se bann krim ki konsern sirtou *child pornography* oubyen bann aktivite pornografi ki konsern zanfan. Ok.

I napa en *accepted universal* sa ki ou apel *cyberprofiling framework*. I

enportan pou nou note ki ler nou regard laspe dil avek sa teknolozi, e ki mannyer i ganny servi e bann ki kapab ganny fer. I annan en lot kote psikolojik ki fer aköz sa dimoun i deside fer sa aktivite.

Parfwa i annan bann eleman psikolojik *involve* ki sa dimoun li menm li i en dimoun ki annan ki riske annan en problem. Me lot kote osi i annan osi en laspe finansyel ki sa dimoun pe rod en gen finansyel. I annan lenstans ki sa 2 i zwenn kanmarad, me i annan lenstans ki sa 2 pa zwenn kanmarad. Ki enn i ganny fer zis pou rezon en lot.

Baze lo lenformasyon ki mon'n kapab kolekte i annan apepre *socially engineer attacks* i konstitye 98 pousan of tou bann data *breach cybercrime*. Savedir pou annan lentera personnel pou nou al rod sa lenformasyon oubyen fer sa keksoz. Byensir i annan bann eleman *corporate espionage*. I annan bann eleman kot bann dimoun i sey atak bann sistenm.

Taler pou al dan *Committee Stage* si nou ariv a sa pwen. E si i annan sa bann kestyon ki monte. Nou a kapab *share* avek zot ki lakantite latak ki nou sistenm sivil i gannyen pandan en lazournen bann

dimoun ki sey antre dan nou sistenm. E bann *framework* ki'n ganny met an plas pou protez sa sistenm.

E bann ranforsman ki'n ganny fer pandan sa bann dernyen mwan zisteman akòz i annan en posibilite sa bann latak. Nou bezwen osi konpran Madanm Speaker, ki nou annan diferan keksoz ki permet nou pou konpran ki poudir ler ou war sa bann *case* pe al Ankour, enn bann eleman ki ganny konsidere e sa nou'n vwar dan bann diferan rapor lo sa bann ka se kwa ki fer sa dimoun deside pou li par egzantip antis zanfan oubyen pran lenformasyon lo *computer* en dimoun e al poste. Pou ki son rezon?

Me sa bann patern *behavior* i enn bann keksoz ki nou bezwen komans note. Enn bann konsern pou bokou Seselwa ozordi se sa size servi anonimite lo bann rezo sosyal, pou poste oubyen fer komantr lo lezot dimoun. Sa dimoun i fer sa avek *impunity* san ekspekte ki i pou ganny okenn reperkasyon, akòz i krwar poudir anonimite i protez li pou li fer sa.

Sa ki nou bezwen regardev, se ki nou bezwen regardev ki mannyer nou kapab met an plas en striktir. E sa Lalwa i al

ver komans ede pou nou fer sa. Wi, i kriminaliz serten kalite aktivite, me lo lot kote se ki sa dimoun in servi *anonymous* 561 pou li poste son zafer ki in poste. I annan en lot eleman prezan ki antre ladan pou etabli ki kalite, ki mannyer ou pou al rod sa dimoun ki ep fer sa.

Souvandfwa i pa fasil pou ou war, akòz i annan bann diferan fason ki sa i ganny fer. Sa dimoun son *IP Address* i kapab pe mars *across* diferan pei. E i pa nesese ki ou pou al direktman lo sa *IP Address*. Me teknoloji pe avanse ki byento sa ki pe fer li anba *anonymous* i pou annan fason pou bann *enforcement agency* konnen kote i ete e lekel li.

Madanm Speaker, nou bezwen osi konpran en keksoz enportan. *Cyber behavioral analysis* i permet nou pou nou pa zis konpran ki mannyer nou dimoun i servi *cyber*. Me osi ki mannyer koman en pei ki bann striktir ki nou bezwen met an plas pou edik nou popilasyon an sa ki konsern servi bann *tools* nimerik, oubyen bann *cyber tools* pou zot fer zot bann aktivite.

Sesel pe al ver en levolisyon en lot kad ekonomik. E si nou regard byen diversifikasyon nou lekonomi

pou osi enkorpor annan en diversifikasyon anver servi bann sistenm nimerik pou kre lezot aktivite ekonomik ki swa *block chain*, ki swa *data center*, ki swa lezot fason *digital currency*. Sa i pou reste en lapros ki bann zenn ki pou annan sa lentansyon e lentere pou develop zot lekora dan sa bann teknolozi pou kapab al ver sa.

Annan bann Lalwa ki protez nou kont bann *cybercrime*, i ava ed nou pou fer sir poudir kad legal i ganny met an plas. Me sa kad legal pa asiz lo li tousel. I bezwen asiz dan en kordinasyon ki permet tou bann lazans ki annan zot rol pou zot zwe pou zot kapab fer sir zot kapab enplimant zot kad regilatwar ki egziste otour zot ozordi dan en fason, dan en fason serye.

E osi asire ki zot kapab met an plas bann mezir pou anpes bann antite ki fer bann aktivite. Par egzamp, si ou regard rol ki *FSA* i annan pou zwe, rol ki *FIU* pou zwe, rol ki *FCIU* i annan pou zwe, e rol ki lapolis li menm li dan en pwennvi pli larz i annan pou zwe. Sa i lo kote bann *Law Enforcement Agencies*.

E lo kote *law enforcement* e ki mannyer tou sa bann kad i *fit to law enforcement*. Lo en lot

kote, nou annan laspe sivilyen ki sorti kot *DICT* ki protez bann lenformasyon ki zot annan. Mon pou donn en legzanp Madanm Speaker. Ozordi Lasanble Nasyonal i annan son prop server en remote server.

Pou en dimoun atak li, i bezwen atak Lasanble Nasyonal atraver son sistenm ki i annan. E si Lasanble pe servi sistenm *Microsoft*, ou annan en lot layer proteksyon ki vin avek, akòz *Microsoft* ler i donn ou servis i *provide* ou avek en sistenm pou protez ou.

Pa tou landrwa ki pou annan menm striktir oubyen annan menm konpetans pou etabli menm striktir proteksyon pou son lenformasyon ki annan la anndan. E se pou sa rezon ki nou bezwen rod en fason pou asire ki *across* pei, tou bann lenstitisyon ki dil avek bann lenformasyon nimerik i kapab met an plas bann sistenm ki protez ou.

Danze pou nou Madanm Speaker, i senp. As nou *move towards* en transformasyon nimerik, nou bezwen kapab fer ki sistenm kot *Civil Status* i koz avek sistenm kot *ASP*. Sistenm kot *ASP* i bezwen kapab koz avek sistenm kot lopital. Lot sistenm i bezwen kapab koz ek kanmarad, pou fer ki par

egzanp Madanm Speaker, si ou annan en dimoun ki annan en problem par egzanp en dezabilite par egzanp *right*.

En dimoun i annan en dezabilite ki permanan. Ou pa kapab en dimoun ki annan en dezabilite ki permanan i bezwen retounen, pou refer en laplikasyon pou li... i bezwen annan en sistenm pou ki montre poudir son *status* pa'n sanze *as of current*. Se pou sa rezon ki ler nou pe koz en transformasyon nimerik se sa ki anmenn nou ver retir bann baryer ki permet nou dimoun, permet nou popilasyon ganny en meyer servis avek sa ki pe pase.

Mon pa pe dir sa ki zot pe gannnen ozordi i pa meyer, me nou toultan bezwen *improve* lo servis ki nou donn nou popilasyon. Akoz se sa rezon akoz ler ou en Gouvernman, ou bi se fer sir poudir ou delivre e donn en meyer servis pou ou popilasyon. Madanm Speaker, avek sa mon oule soumet *Cybercrime and Other Related Crimes Bill* devan Lasanble Nasyonal.

E mon pare pandan deba pran okenn kestyon oubyen konsern ki bann Manm i ava annan dan *right of reply*. E mon swete ki mon ava ganny parey mon'n dir lo komansman *buy in*

Lasanble Nasyonal dan son antyerte pou laprouvasyon sa Prozedlwa ozordi bomaten devan Lasanble. Mon remersi ou Madanm Speaker, pou letan ki mon'n gannnen pou prezant sa Lalwa.

Mon remersi bann Manm pou zot latansyon. E mon swete parey nou'n dir *we can have a debate*. E apre nou ava konnen ki mannyer pou nou bouz devan. Si i annan bann sizesyon, mon annan bann teknisyen sorti kot *DICT* ki kapab enkorpor li *from* en *technical prospective*.

Me apre nou ava pas sa avek bann lazans konsernen ki pou fer son kote Ladministrasyon Lalwa oubyen lenplimantasyon Lalwa. Mersi Madanm Speaker.

MADAM SPEAKER

Mersi Vis-Prezidan. Nou ava aprezan pran deba zeneral lo *Bill*. Okenn entervenans? Nou pou napa okenn entervenans lo sa *Bill*? Onorab Hoareau.

HON JOHN HOAREAU

Mersi Madanm Speaker. Bonzour Madanm Speaker. Bonzour tou dimoun ki a lekout, anvi ki *US* in prezant zot *Bill*. Me person pa'n lev lanmen pou koze. Mon ava dir 2 pti mo lo sa *Bill*. Premyerman

mon pou dir poudir i en *Bill* ki al dan en bon direksyon, parey VP in eksplike i en *Bill* ki'n annan konsantman lo tou lede kote politik vedir *US* avek *LDS*.

E *LDS* in travay lo sa *Bill* en pe letan avan ki *US* in vini. E *US* in vini in met son bout, e *Bill* in ariv kot nou ozordi pou diskite. Bon, sa *Bill* keksoz ki mon krwar i pli enportan ladan pou mwan e pou mon bann dimoun osi ki pe ekout mwan se sa bout ki konsern *child pornography*.

Akoz mon pe dir sa, aköz laplipar bann lekol dan bann distrik i annan sa bann keksoz ki pase dan bann lekol, kot en adilt i servi en linosans en zenn marmay pou li sorti avek sa zenn marmay. E osi souvandfwa ki zot fer, zot filmen sa. Me zot filmen sa, me zot pa filmen zot, zot filmen sa zanfán. Se pou sela rezon ki toultan i annan en *trace* ki nou kapab ki lotorite i kapab servi pou kapab konnen lekol sa dimoun ki pe fer sa bann kriminalite.

I zot fer sa bann aksyon avek sa bann zenn marmay, zot filmen e pli tar zot pibliy sa lo *Facebook*. Sa si oule i en keksoz ki degradan, i en keksoz ki afekte dinyite sa zanfán li menm e abiz linosans sa zanfán. nou konnen poudir anba Kod Penal poudir sa bann

keksoz i ganny trete dan en lot fason. Bann kriminalite kont bann interfering with a minor defilement eksetera.

Me isi lo sa kote *Cybercrime Bill (Amendment)* *Bill* ki pe vini la, la i pe met en lot nivo proteksyon pou sa bann zanfán. Vedir ki si en dimoun i *knowingly and intentionally*, e anvoy sa bann zimaz pornografik, zimaz degradan lo sa bann zanfán i kapab ganny plis kondannasyon *compound* lo son *case* pou fer sir ki *maximum sentence* i ganny *administer* pou sa bann *case* koumsa.

E sa pou mwan i en bon *deterrent* e mon *even* ti a kontan vwar sa Lalwa al pli lwen ki sa, aköz ler nou pe get sa mo lafason ki in ganny ekrir *knowingly and intentionally* apre i donn ou bann diferan keksoz ki sa dimoun i fer ki *constitute to a crime*. Nou vwar ki poudir i vin en keksoz ki annan en *very high threshold* pou si oule pou prouve, aköz pou ou *prove knowingly ek intentionally* i de nivo ase o pou prouve. E ou bezwen bann avoka ki vremen kapab fer sa travay pou kapab anmenn sa bann *case*, anmenn sa bann prosekisyon devan.

Bon, an dizan sa mon krwar osi ki poudir sa *Bill* ki

devan nou i osi al ver anver bann Konvansyon ki nou pe, ki nou sinyen par egzant parey ki VP in fer resorti Konvansyon *Budapest* kot i epe met serten lankadremman global si oule pou bann *signatories* bann pei ki *signatories to the Conventions* pou zot kapab enplimante pou anmenn pli bon nivo sekirite *cyber*.

E parey VP in dir i annan serten larzan ki *World Bank* i sipoze pe donnen, pou kapab fer sa *rollout plan* pou sa *Bill* pou sa bann lamannman ki pe ganny propoze. E mwan mon ti a kontan ki VP i eksplik nou enpti pe an detay ki fason sa larzan pou ganny servi pli tar pou kapab enplimant oubyen *rule out* sa *Bill* ki devan nou.

Madanm Speaker, mon krwar poudir sa *Bill* i pe al dan en bon direksyon. I koz osi lo bann zafer *revenge pornography* kot en dimoun i kapab servi parey pe dir anba bann *profile* anonim pou zot kapab pran revanz lo en dimoun oubyen *extort* serten larzan avek en dimoun lo baz serten portre, serten lenformasyon osi ki ganny devwale.

So, li menm i pe met en standar en pe pli e leve lo *cybercrime*. E mon krwar parey mon pe dir i al dan bon direksyon. Mon pa pou koz tro

bokou lo la, me mon krwar i al dan bon direksyon. E nou'n vwar serten pei tou resaman parey Lostrali ki in al pli devan ki nou ankor. In met serten bane lo bann marmay anba 16an pou itiliz *TikTok* avek *Instagram*.

E sa dan li menm i montre poudir sa bann pei pli avanse ki nou pe anmenn serten proteksyon lo zot bann zanfann, lo zot bann miner ki *at the extreme* pou kapab protez zot kont bann diferan keksoz ki kapab afekte zot dinyite pli tar, e afekte zot koman en imen. Mon osi mon krwar poudir petet dan lefitir nou bezwen get dan sa nivo osi, gete ki fason nou kapab fer li dan serten fason ki i pa *unconstitutional* nou pa pe *impinge* lo drwa personnn.

Me selman *at the same time* nou pe anmenn plis proteksyon kont sa ban dimoun ki abiz nou bann zanfann, e servi sa bann portre pou glorifye zot lekor oubyen pou lezot rezon ki zot santi zot pe fer li. Madanm Speaker, avek sa mon pou donn mon sipor sa *Bill*, aköz mon krwar i en *Bill* ki al dan bon direksyon. E i en *Bill* ki pou anmenn plis sekirite lo kote *internet*, lo kote *cybercrime*.

Me an menm tan, ki mon pe dir sa i annan bokou dimoun osi ki par egzant lo bann zafer

AI ki zot vwar i pa'n ganny entegre ladan. E mwan mon konpran ase byen ki poudir AI i en *tool rather than a subject to a criminal offence*.

So, petet si VP dan son *summing up* i ti kapab eksplike akoz ki i napa lentegrasyon AI dan sa *Bill* pou fer ki i en *Bill* ki kouver en pti pe pli gran *spectrum*. Avek sa Madanm Speaker, mon ava remersi ou.

(APPLAUSE)

MADAM SPEAKER

Mersi. Onorab Lemiel.

HON SYLVANNE LEMIEL

Sorry. Mersi Madanm Speaker. Madanm Speaker, koleg Manm Onorab tou dimoun ki a lekout bonzour. Madanm Speaker, avan petet ki mon koz lo amannman ki pe propoze i enportan petet pou met sa *Bill* li menm dan son konteks istorik.

Lalwa *Cybercrimes and other related crimes Act 2021, Act 51 of 2021* i reprezant kad legal prensipal Sesel pou konbat bann lofans ki ganny fer atraver sistenm konpiter, bann platform elektronik e bann teknoloji komunikasyon nimerik ki nou dir *digital*. Swivan lenstriman statiter limero 15 2022, sa ki nou apel li en *S.I. S.I 15 of 2022 and*

Other Related Crimes Act 2021 commencement notice date ti le 31 Zanvye 2022 ti fer ki Lalwa i antre anfors le 1 Fevriye 2022.

Sa Lalwa ti ganny fer pou moderniz e ranforsi nou Sistenm Lazistis Kriminel, fas a bann menas cyber ki pe evolue vitman. Se dan sa konteks 3an apre son komansman ki nou pe konsider *Cybercrimes and Other Related Crimes (Amendment) Bill, 2025* avek lobzektif pou aliny nou Lalwa Domestik avek konvansyon *Budapest* ki nou apel li *Budapest Convention* i ranforsi fondasyon sa Lalwa.

Madanm Speaker, apre ki mon'n eksplik konteks istorik ki nou'n anmennen, ki'n anmenn nou ziska la mon pou aprezan swiv avek lezot parti sa *Bill* ki devan nou. Premye seri amannman konsern definisyon dan Lalwa prensipal.

Bann klarifikasyon pou fer sir ki nou terminoloji i anliny avek fason ki *cybercrime* i ganny konpran globalman, sirtou anba Lartik 1 *Budapest Convention* ki defini langaz esansyel ki bann leta i servi pou konbat lofans *cyber*. Par adopte sa vokabiler komen, Sesel i redwir konfizyon e ranforsi son kapasite pou kolabor efektivman avek bann partner enternasyonal.

Sa *Bill* osi i ranforsi nou ziridiksyon, i fer kler ki Sesel i kapab dil avek bann lofans cyber i ganny fer par son sitwayen. Menm si sa aksyon i ariv aletranze. Si sa i en lofans dan sa pei etranze. Sa i reflekte Lartik 22(1)(2) *Budapest Convention*. E i rekonnet realite san frontyer *Cybercrime* ozordi.

Amanman osi i met azour bann lofans cyber prensipal dan nou Lalwa pou pli byen reflekte realite modern. Bann sanzman i konsistan avek lofans anba *Budapest Convention* dan Lartik 2 ziska Lartik 11. An plis ki bann lofans teknik, sa *Bill* i koz lo lenpak imen ki vreman grav akòz move konportman *online*.

Antye sa seksyon pe ganny ranplase par adres li pli presizeman *cyber restoration*, *cyber harassment*, *cyber stalking* ek *revenge pornography*. Bann lofans ki'n koz bokou soufrans dan nou kominote Madanm Speaker. bann dispozisyon ek siport lespri Lartik 9 *Budapest Conventions* i rekonnet gravite bann konteni *online* ki kapab vize ver bann zanfan.

Alor, sa *Bill* pa zis konsern lofans kont masin. I konsern protez dimoun. *Bill* i al pli lwen pa adres bann ki fasilite lofans *cyber*, swa par ed bann kriminel

oubyen par mankman sirveyans e kontrol. Sa i osi entrodwir responsabilite legal pou *tentative cybercrime*, ede e ankouraz *cybercrime*.

E pou bann antite legal ek son bann zofisye ki pa met bon kontrol, e permet move aksyon. An plis sa *Bill* i donn bann lorganizasyon ki fer lenvestigasyon plis pouvwar pou protez e gard levidans nimerik. Bann tras *cyber* i kapab disparet dan segonn. E sa kapasite pou prezerv e akse bann data, lazistis pa kapab ganny fer.

Madanm Speaker, sa i met an pratik Lartik 14 ziska 19 *Budapest Convention*, pou fer sir Sesel i kapab gard, prezerv e ganny levidans elektronik nesese pou fer lenvestigasyon e prosekisyon. Madanm Speaker, sa bann lamannman i ariv dan bon letan. Le 18 Zen 2025, Sesel ti ganny envite formelman pou akse avek *Budapest Convention* lo *cybercrime*.

Sa lenvitasyon i reste valab pou 5an. E sa *Bill* i en parti kritik dan nou preparasyon pou akse. Nou pa pe antre dan en langazman enternasyonal san refleksyon. Nou pe fer sir ki ler Sesel i akse nou Lalwa Domestik i pare, konpatib e kredib. Nou bann

partner i bezwen konnen ki nou serye. E nou sitwayen i bezwen konnen ki zot proteze.

An bref sa *Bill* i ferm bann vid, i ogmant standar. I prepar Sesel pou partisip antyerman dan lalit global kont *cybercrime*. I reflekte en lapros modern, responsab e *proactive* pou gard nou lavenir nimerik oubyen *digital* an sekirite. Nou osi note Madanm Speaker, ki pandan ki lezot pei in avanse dan sa domenn, bann lobzektif pli anbisye in paret enkli partisipasyon dan en rezo permanan 24 lo 7, 24/7 *contact network* pou korperasyon lo *cybercrime*.

Sa mekaniz pou permet Sesel kordin avek bann lotorite etranze. Antan reel reponn vitman kont menas transfortyer. E prezerv levidans nimerik oubyen *digital* avan i disparet. Me Madanm Speaker, pandan ki sa bann lobzektif i kapab form parti nou program m lavenir sa *Bill* i semen ki anmenn nou laba.

Avan nou kapab taye nou bezwen marse. E avan nou marse, nou bezwen debout byen e ferm. Sa *Bill* i donn nou sa fondasyon solid, sa baz lo ki nou kapab konstri bann kapasite pli avanse pli tar. Mon alor rekomande *Cybercrimes and Other Related Crimes*

(*Amended*) *Bill*, 2025 avek nou Lasanble Nasyonal.

E mon envit tou nou bann koleg Manm Onorab, pou zot siport sa *Bill* aköz i en *Bill* ki vremen bon pou nou pei. I en pa ver lavansman, dekouvert, krim ki ganny fer atraver bann diferan rezo. E sa i vremen, vremen bon pou Sesel. E pou bann pei ki partner osi avek. E letan nou pe koz dan korperasyon enternasyonal, sa i vin en lot pa pli devan pou nou.

E se sa, se pou sa rezon ki mon pou demann nou bann, mon bann koleg isi dan Lasanble pou zot anmenn zot sipor a sa *Bill*. Mersi Madanm Speaker.

(APPLAUSE)

MADAM SPEAKER

Mersi Onorab. Onorab Sandra Sultan.

HON SANDRA SULTAN

Madanm Speaker. *VP* avek ou delegasyon, e lezot Manm Onorab. E tou bann zabitan a lekout bonzour. Madanm Speaker, *Cyber Bill* i ganny dekrir par bann aksyon ilegal ki ganny fer atraver konpiter, internet ek bann lezot sistenm *digital*. Sa i enkli bann aksyon tel ki vol larzan *online*, *scam*, *hacking*, menas lo rezo sosyal,

vol don personnel e lezot latak ilegal lo *internet*.

Dan Sesel *cybercrime* pe ogmante, anvi ki plis dimoun i servi *internet*, *Mobile Banking* e lezot rezo sosyal. Dapre resers, bann *cybercrime* ki pli popiler dan sesel i premyerman *scam* finansyel. I annan en logmantasyon kot dimoun e biznes pe perdi larzan atraver fo *email*, e fo dokiman pou transfer larzan.

Fo lotri kot ou ganny dir ki ou'n ganny larzan, anvoy detay kont pou transfer larzan. Bann kriminel souvandfwa zot *hack email* oubyen fer krwar ki zot bann zofisye labank oubyen en biznes. Zot menm servi byen bann *logo* labank pou anbet dimoun.

Madanm Speaker, fo mesaz i osi en form krim kot bokou dimoun i resevwar *email*, *SMS* oubyen mesaz *WhatsApp* ki demann detay labank *password* ouswa kod sekirite. Pa bliy nou *famous romance scam*, i annan Seselwa ki krwar dan en relasyon *online* kot zot ganny demande pou anvoy larzan kot sa partner i promet zot ki i pou fer zot monte apre. Kot i souvandfwa i pa leka.

Bokou *cybercrime* ki afekte Sesel e Seselwa ki sorti aletranze. E sa i fer sa bann kalite krim i vin pli difisil pou

lapolis fer investigasyon. Alor, avek tou sa bann defi sa lamannman dan sa *Bill* pe fer sa bann provizyon swivan. Anlinyen avek standar enternasyonal Lalwa pe amann Lalwa *Cybercrime Act 2021*, pou li anliny avek konvansyon *Budapest* pou *cybercrime*.

E permet korperasyon enternasyonal pou konbat menas ki travers frontyer. Ziridiksyon an deor Sesel: i annan bokou sitwayen Seselwa ki fer krim lo *internet* deor Sesel, pou ganny pourswiv anba sa *cybercrime Act*.

Santans pli dir pou pornografi zanfan i amannman ki pli enportan. Santans maksimonm pou pornografi zanfan i ogmante sorti 5an pou vin 10an. Nouvo lofans e klarifikasyon, ekstansyon lo *internet*, *harassment*, swivi obsede e kominikasyon ofansif an menm tan pou protez laliberte koze e eksprimen.

Responsabilite korperasyon: lentrodiksyon responsabilite pou lorganizasyon *corporate* ki komet lofans *cybercrime*. I pou osi elarzi prevansyon. Seksyon 20 a permet gard levidans menm si krim pa enteryerman *cyber*, me servi teknolozi pou fer lofans. *FIU* i kapab servi sa

bann san bezwen amann zot Lalwa.

Adres bann nouvo menas: Klasifikasyon lo lentelizans artifisyel *AI* ek *defect* ki fer avek *video* ouswa lavwa ki ganny modifiye avek lentelizans artifisyel. Dispozisyon pou konbat frod e forzri lo *internet*, penal kod osi pou kriminaliz forzri ek frod. Pornografi zanfan lo medya sosyal, nenport dimoun ki partaz *video* seksyèl avek zanfan lo medya sosyal pou ganny akize anba *Cybercrime Act* menm si lofans orizinal i tonm anba Lalwa *Child Abuse*.

Sistenm sekirite, sekirite sistenm Gouvènmman: Lalwa i adres risk akòz sistenm Gouvènmman i santralize ki i fer pli fasil pou *hacker* antre par *backdoor access* avek plizyer mil menas rapòte. Madanm Speaker, finalman sa Lalwa i pou en zouti legal ki pou vremen esansyèl pou *Cybercrime Unit* dan Departman Lapolis, pou ki zot a kapab adres bann defi dan sa *digital landscape*.

I pou ogmant sipò pou bann viktim, met an prevansyon an plas an mezir ki zot osi edik nou popilasyon. *Investigation* e prosekisyon a vin pli efikas. E avek sa mon

pou donn *full* sipò pou sa *Bill*. Mersi.

(APPLAUSE)

MADAM SPEAKER

Mersi Onorab Egbert Aglae.

HON EGBERT AGLAE

Mersi Madanm Speaker. Bonzour *VP* ek ou *panel*. Tou Manm Onorab, e tou dimoun ki a lekout. Madanm Speaker, sa *Bill* lamannman ki devan nou avek *cybercrimes* ek *related crimes* i pa en nouvo *Bill* ki mon'n deza koz lo la isi dan 7enm Lasanble, e i annan son lenportans.

E sa *Bill* i pa en *Bill* ki Sesel koman en pei in zis deside adopte ouswa vin avek. Me i en ekstansyon Konvansyon *Budapest*, i koz lo bann size *cybercrime*. E osi annan plizyer morso Lalwa Lezislasyon ki'n vin anfers atraver bann diferan konvansyon osi ki i annan en legzisans kot ou bezwen apre ki nou, nou siny ouswa nou form par sa bann lagreman. Nou bezwen *domesticate* li lokalman, pou nou kapab met li dan form Lalwa. E se sa ki pe ganny fer ozordi.

E osi nou konsyan poudir sa size ki en size enportan ki pou annan en konotasyon kot nou bezwen are pli vizilan, pli

pridan lo bann evolisyon ki pe arive dan teknolozi. E sa size teknolozi *AI* i pou en size ki pli dominan, i pou annan son bon kote. E i pou osi annan son bann, malez ki vin avek dan bann fitir ki pe vini.

E koman en pei nou bezwen touzour met nou azour pou sof gard nou bann lentere, nou bann aki, nou lekonomi li menm kont bann pratik ki kapab vin ouswa poz en fardo lo pei li menm. E osi nou konsyan poudir in annan diferan sirkonstans. E nou'n war lo nivo enternasyonal bann pratik malis ouswa teroris parey mon dir.

Cyber terrorism ki'n menas plizyer bann antite mondyal. E si nou napa bann proteksyon nesaser, parey *expert* i dir i kapab *bring a country down to his knees* mon kapab dir. Bann diferan form ki ozordi ki komen ki nou pe vwar kot i konsern *cybercrime*, nou'n war plizyer e menm lokalman bann antite ki sofgard sityasyon finansyel.

Nou annan bann *site financial theft* ki'n arive. Nou'n annan bann idantite theft kot idantite dimoun i ganny vole apre i ganny servi pou bann aksyon kriminel. Nou annan bann size bann *malware*, bann viris ki ganny *spread*, ki atak

bann sistenm dan bann diferan antite. Nou osi annan sa ki nou apel Kot ou ganny met otaz finansyerman pou pey kot ou data i ganny pran i ganny *capture*, apre ou ganny demande pou ou kapab pey en larzan pou ou reganny li.

Nou osi konsyan ki poudir ozordi bann zenn ki vreman doue, sirtou sa zenerasyon vreman doue avek lavansman teknolozi. E si nou pa et pridan lo zot litalizasyon, i pou poz serten danze sirtou bann paran ki pa pe met sirveyans lo kwa ki pe ganny arive letan nou zanfan pe servi sa bann teknolozi.

E osi mon'n *come across* plizyer bann laplikasyon ki pe ganny devlope, pou kapab osi annan sa *oversight* ek *monitoring* letan nou zanfan pe servi sa bann teknolozi parey. E i annan pei tou resaman Lostrali in vin avek regilasyon, kot i pe protez sirtou bann ki miner ki anba laz kont ekspoze avek bann kontyen, bann diferan sit nimerik ki pa nesaserman dan zot lavantaz ouswa zot laz dan li menm.

E dan *Bill* osi la, pe fer referans avek bann nouvo eleman ki pe ganny entrodwir ki pa ti pe pran kont e ki mon konstate ki pou annan bann lezot lamannman ki pou vini a lavenir kot i konsern sa

konvansyon, pou pran *the AI context* ki atraver ou Madanm Speaker, ki Onorab Hoareau in nonmen ki pa neseserman pe ganny kapte dan sa *Bill*.

Me selman mon konnen ki a lavenir akòz *AI* pe komans vin vreman popiler avek son bann diferan laplikasyon, menm si i en zouti ki nou kapab servi pou fasilite nou travay dan diferan konteks. An menm tan nou konnen poudir i annan sa bann *computer programmer* ouswa bann sirtou bann ki pe fonksyonnen anba en *dark web* i kapab ganny servi pou komet bann krim.

E se la ki mon krwar i enportan pou nou konsyan lo bann evolasyon ki pou vini e bann inovasyon e bann lamannman fitir ki pou bezwen arive. En lot pwèn i konsern ziridiksyon kot krim pe ganny komet anba sa Lalwa, *ok*. E ozordi i fer ki nenpòt landrwa ki en endividi i komet sa krim i pou kapab ganny prosekite dan sa pei.

E dan lepass nou'n war poudir in annan bann endividi (ki mon pa pou oule nonm non la) ki'n atraver bann diferan platform kot swa zot ti pe vol lenformasyon ouswa ti pe *disseminate* pas bann lenformasyon ki sipoze klasifye. E nou'n war poudir bann

difikilte ki'n arive pou kapab anmèn sa bann dimoun dan en lakour lazistis dan pei.

Sa ti akòz ti annan petet bann Lalwa ekstradisyon pa ti ankor vin azour ouswa napa en lagreman avek en pei pou ou kapab *either* deport sa dimoun pou li *face the trial*. So, keksoz pe al dan en bon direksyon ki fer ki Lalwa ek lamannman ki la devan nou i fer ki ou kapab ganny prosekite anba diferan sa bann ziridiksyon.

Prezan letan mon pe get nou dan *local context*, nou konnen nou annan en Departman *DICT* ki fonksyonnel. E osi nou annan anba Lapolis *Unit* ki osi dil avek sirtou bann krim ki konsern parey *cyberbullying*. Nou annan bann *cyber theft* ki arive. Petet *VP* sa ki mwan petet mon ti a kontan petet vwar se kwa ki nou pe mazin fer an plis pou anmèn sa lekspektiz avek son depi son lenfrastriktir, depi son bann *asset* nesese.

Pou nou kapab annan en modern ouswa moderniz nou bann antite ki sipoze pe konbat bann *cybercrime* ek bann lofans ki relye avek. nou'n koz lo *Facebook*, nou'n koz lo *anonymous*. Tousala sa bann keksoz i pe vin plizanpli dan konteks, mon pa anvi servi sa term danzere. Me selman i pe

koz serten danze parfwa, ouswa problemm akòz nenport ler lenformasyon i ganny zis *pop-up* ouswa en latak i vini kot ou pa pou kapab al rod en rekour, lazistis akòz ou pa konnen lekel.

So, nou, nou bezwen konsyan poudir sa size *cybercrime* i pou enn ki pou vin pli serye e pli grav o firamezir bann inovasyon teknolozi i vini. Menm ozordi, mon ti regard en program kot nou annan sa ki nou apel bann *Smart Home*. Tou keksoz teknolozi ki kontrole anba en sistenm *computerized*. E ti annan bann lesey avek enn sa bann dimoun ki ti pe ki ti annan, e i ti ganny kit an deor son prop lakaz akòz sa.

Zot ti pran son bann sistenm *hijack*, e nou ti war poudir sa dimoun ti pas dan en kantite difikilte. So, se sa letan mon pe dir inovasyon o firamezir nou pe bouze bann zenerasyon ki pe monte nou annan bann lorganizasyon osi, byento nou pou re anmenn *NISTI*. Nou pou war poudir i annan bann nesosite pou nou kapab annan plis ledikasyon, *training*, pou bann *expert* pou zot kapab detekte bann sityasyon *cybercrime* e bann lofans ase boner.

So, avek sa mon santi ki poudir sa *Bill* i pa en *Bill* ki ni pou *LDS*, ni pou *US*, i en *Bill* ki annan pou fer avek sekirite pou en pei kot i konsern bann domenn nimerik kot nou lekonomi i pa ava ganny targete, i ava ganny proteze. E osi bann *social platform* ki egziste zot a bezwen reste zot osi azour e konsyan ki kalite content ki zot pe *release*. Ki i pa a vin an defo avek *the norm* ki Lalwa i demande.

E an terminan, seize pornografi i en size ki sirtou avek zanf an i en size ki vreman enkyetan akòz tanzantan nou war bann sirkilasyon ki arive, dan bann group sirtou *WhatsApp*. E ki mwan mon depler sa bann kalite pratik. En miner pa devret pe ganny servi dan okenn konteks ki swa pou fer larzan, ki swa pou benefis personnel. Nou bezwen konsyan. E i annan Lalwa ki protez sa bann miner.

So, en responsabilite osi i tonm lo nou koman bann Manm Parlman pou kontinyen edik, e fer ki sa bann pratik i diskontinyen ouswa nou pa ankouraze konmsi nou menm nou pa ede pou propaze osi sa bann keksoz parey. So, avek sa Madanm Speaker, mon pou siport sa *Bill* akòz i pou en keksoz ki pou ed nou *in the long*

run pou nou kapab deter e osi annan en kad legal. Si pou annan prosekisyon osi ki swa nivo lokal ouswa enternasyonal. Mersi.

(APPLAUSE)

MADAM SPEAKER

Mersi Onorab. Onorab Robert David.

HON ROBERT DAVID

Mersi Madanm Speaker e Bonzour. Tou Manm Onorab bonzour, e tou bann dimoun ki pe swiv nou. Bonzour Vis-Prezidan ek ou delegasyon. Bonzour Madanm Speaker.

Mosyon ki devan nou pe demann Lasanble Nasyonal pou aprouv *Cybercrime and Other Related Crime (Amendment) Bill, 2025*. I annan en nesesite Madanm Speaker pou sa Lalwa konble bann mankman ki ti aparet dan son dernyen versyon. Lobzektif sa *Bill*, i pou amannman sa *Act*, sa *Cybercrime and Other Related Crimes Act, 2012* pou asire ki i vin anliny avek Konvansyon *Budapest*.

Efektivman adres bann menas e promot sekirite lo internet. Sa bann lamannman ki pe ganny propoze, i annan lentansyon pou fer sanzman nesesser avek Lalwa ki pou fer sa

Lalwa antye vin konsistan. E permet korperasyon enternasyonal ki enportan dan *cybercrime*, prenon kont son natir ant bann teritwar.

E sa i ant bann pei ouswa ant endividi ek biznes sorti dan diferan pei. En lepok Madanm Speaker, kot plis dimoun pe servi internet tou le zour pou fer diferan tranzaksyon. Sa i lo en baz prive, e osi lo en baz komersyal. I annan convention on *cybercrime* ki sa konvansyon i premye trete lo lofans ki ganny komet atraver rezo *internet*, e lezot rezo ankor ki dil prensipalman avek vyolasyon drwa oter, frod atraver *computer*, pornografi zanf an vyolasyon bann striktir sekirite *internet*.

I osi kotye en seri lotorite e prosedir par egzanp resers lo rezo internet e zot enterpretasyon. Lo son bann lobzektif prensipal, i etabli dan son preanbil pou promot en Polisi komen kont lofans vize ver proteksyon lasosyete kont lofans internet. Espesyalman ver adopsyon Lalwa e ankouraz korperasyon enternasyonal.

Madanm Speaker, bann benefis sa konvansyon aprezan. Sa Konvansyon *Budapest*, i plis ki en dokiman legal e en kad ki permet en kantite akter sorti dan diferan parti pou partaz

leksperyans e kree relasyon ki fasilite korperasyon dan bann ka spesifik enkli bann sityasyon irzans ki an deor bann provizyon ki ganny previ dan sa konvansyon.

Nenport ki pei i kapab servi sa konvansyon koman en gid, ouswa en model pou fer son prop Lalwa Madanm Speaker. Pou form parti sa trete, i annan ankor plis lavantaz. Sa Lalwa ki devan nou, i ranforsi drwa dinyite ki resorti anba Lartik 16 nou Konstitisyon. E son drwa endividi pou *right of privacy*.

Seksyon preanbil nou Konstitisyon i fer resorti ki soutenir Lalwa baze lo rekonisyon drwa fondamantal imen e laliberte enkripte dan nou Konstitisyon e lo respe pou egalite dinyite imen. Lartik 16 nou Konstitisyon i dir nou ki tou dimoun i annan en drwa pou ganny trete avek dinyite koman en imen.

Bann krim enternet i konpri en seri lofans Madanm Speaker, ki akse ki pa'n ganny otorize avek en sistenm *internet*, frod e sirkilasyon portre ki pa'n ganny otorize. Bann lofans se ler ou akse en sistenm *internet*, ouswa lenformasyon san permisyon i en lofans. Sa i enkli *hacking* dan en sistenm pou pran

lenformasyon ouswa deranz sa sistenm.

Lenterferans avek en sistenm enternet. Sa i bann aksyon ki enterfer avek fonksyonman en sistenm, par egzanp pou entrodwir viris, efas lenformasyon ouswa sanz lenformasyon san lotorite. Ford lo *internet*. Sa i enkli bann *scam online*, par egzanp vol idantite en endividi e frod finansyel bann lotri ki pa zanmen ganny tire.

I osi enkli bann responsab ki eksplwat teknoloji pou anbet dimoun pou bann benefis finansyel. Bann kriminel ki servi lenformasyon teknoloji par egzanp anpes dimoun ganny akse avek servis enternet, e target bann lenfrastruktir e servis letan esansyel. Sa *Bill* pe fer provizyon pou adres bann tel krim ki annan potansyel pou afekte fonksyonman bann lenstitisyon enportan.

Bann krim ki ganny fasilite par *internet* ki enkli bann krim par egzanp trafik imen, e trafik drog. Sirkilasyon bann portre san konsantman bann dimoun Madanm Speaker, i osi en lot krim ki sa *Bill* pe permet nou dil avek. Sa lofans ti ganny rekonnet dan Konvansyon Nasyon z-Ini, i enkli distribisyon portre prive

en endividi san son konsantman ki kapab annan konsekans sever lo laspe emosyonnel e psikoloji sa viktim.

E pous a Madanm Speaker, mon pe propoze ki Seksyon Lapolis osi i devret seryezman konsider en, etabli en *Cybercrime Unit* ki a ede dan lenvestigasyon sa bann krim parey. Madanm Speaker, mon pou sipòt sa *Bill*, akòz i pou ede ranfòsi sa kad legal e donn proteksyon bann viktim.

E donn osi bann lazans nesese ek zouti pou travay pou enplimant sa *Bill* e fer li vin efektiv. Mon remersi ou Madanm Speaker.

(APPLAUSE)

MADAM SPEAKER

Mersi Onorab. Nou pou aprezan *break* pou 30 minit. Mersi.

(BREAK)

MADAM SPEAKER

Bon, nou ava rebran deba zeneral lo *Bill*. Onorab Sandy Arissol.

HON SANDY ARISSOL

Madanm Speaker, bonzour. Mersi bonzour Madanm Speaker. Bonzour *VP* avek ou

lekip. Bonzour tou bann Manm Lasanble Nasyonal, e tou dimoun ki a lekout.

Madanm Speaker, nou vwar nou ozordi devan Lasanble, pe anmenn en *Bill* ki koz *Cybercrime* avek tou son bann krim ki vin avek parey tou bann lezot Manm in koz lo la.

Mon rapel letan lemonn nou ti pe antre dan lannen 2000 lemonn ti per, tou dimoun ti efreye sa letan mon rapel e menm lo *SBC* sa letan ti annan en program ki ti apel *Beyond 2000*. Kot ti pe montre nou bann devlopman ki mannyer loto pou ete sa letan, ki mannyer lavi i sipoze ete sa letan.

Me lemonn ti annan en lafreier, lafreier ki lemonn ti annan sa letan zot ti dir avyon i riske pa *take off*, avyon i riske ganny problem, bann kont labank i riske ganny *freeze*, bann *computer* pa marse.

Me sa ti sa ki zonm ti pe mazin en ti riske arive, paski sa ti sete teknoloji sa letan. Me apre nou anbras lannen 2000 ziska nou'n ariv 2025 sa ki'n sanse nou'n zwenn 2025, e nou ankò pe viv avek teknoloji.

E ozordi teknoloji in vin en zouti ki kontan pa kontan nou tou nou'n bezwen anbras li dan en fason ou en lot. Me selman parey tou keksoz

teknoloji i annan son bon kote i annan son move kote, e Lalwa ozordi pe permet nou pour nou gete koman en pti pei ki mannyer nou, nou fer bokou pli byen pour nou sey konbat en pe osi bann move keksoz.

Par egzanp, mon get zis transpor, transpor avek teknoloji ki nou pe koz lo la ki form parti lavi tou le zour, transpor en lepok nou ti annan bann transpor ki ti servi bann batri lasid, e letan bann batri *dry cell* ti pe antre ti annan en pe konplent “ar sa pa pou mars tro lontan, pa pou ariv bokou letan.”

Me ozordi tou transpor ki antre dan pei se pa bann transpor ki annan bann batri lasid kot nou ti bezwen met delo, gete tanzantan sekwe li fer sir i *ok*. Mazorite bann batri ozordi ki pe servi dan bann transpir se bann batri *dry cell* parey nou apel zot.

E annou get osi transpor, mon koz transpor parski en keksoz ki nou tou nou servi, en lepok nou ti annan tou bann mazorite transpor sete bann *manual gear*, ou ti bezwen pas ou premyer, segonn, pez *clutch*, large dousman pour li pa toufe pour li pa tennyen.

Me ozordi mazorite transpor ki pe antre dan pei preski tou se bann *automatic*

gear ki lemonn pe fer fas avek, parski tousala ozordi se bann teknoloji ki zonm ek fanm i bezwen viv avek.

Trwazyenmman nou annan osi sa ki nou apel bann transpor ki servi *fuel* letan ou fer en pti letour ozordi bann transpor ki pe ganny *advertise* se bann transpor ozordi ki ou sarz li, ou annan son konekter ki ou met li avek elektrisite e ou loto i ganny lavi pour li kapab anmenn ou serten landrwa ziska ou resarz li.

Tousala Madanm Speaker, i form parti sa teknoloji ki nou pe viv ozordi, mon kontan dan Bonzour Sesel i annan en program kot zot *interview* bann dimoun pe demann li en pti git an relasyon avek Nwel lepase avek Nwel konmela.

Mazorite bann dimoun ki en pe pli ansyen i dir ek ou i kontan son nwel lepase ti pli gou ti annan plis lanbyans, e zot koz an relasyon avek annan sa brans sed dan lakaz son loder ti pli enteresan.

Me zot osi bliye pou dir tousala in transformen sa, in transformen ozordi ou annan en pye sed ki ou aste ki ou kapab demont li an trwa four li anmar li en landrwa tir li ankor lannen prosen, parski nou nepli ganny sa posibilite parey tou

dimoun pa ganny sa posibilite pour li ganny sa brans sed ki nou servi.

E ozordi tousala Madanm Speaker, se bann teknolozi mon osi rapel i annan Mr Moustache, ki ti travay dan en seksyon Labank Santral kot tanzantan i ti bezwen vin lo medya pour li anonse pour li dir avek nou bann Seselwa aret anvoy nou bann kont personnel bann dimoun ki nou pa konnen, annou pa transfer larzan avek sa dimoun ki fer krwar i annan enn son papa in mor i pe rod en pti lasistans, oubyen ou'n ganny en *jackpot*, oubyen en *bingo* parey in ganny dir i ti menm mont lo televizyon plizyer fwa pour li sey *convince* tou Seselwa pour nou aret antre en pe dan sa bann krim *cyber*, teknolozi ki zisteman ki egziste ozordi dan lemonn.

I annan en kantite legzanp ki'n ganny donnen. So, mon krwar i enportan. Me le pwen i reste se ki teknolozi toultan i vin avek son bon kote e osi son move kote, e ozordi letan nou asize isi si ou annan en zanmi ou annan en manm fanmir aletranze ou anvi ganny kontak avek li dan detruwa segonn se atraver nou telefonn en *WhatsApp*, en *email* ou anvoy li olye al poste en let par lapos kot

i pou pran en pe letan ki p-a pou zanmen gannyen.

Tousala se bann teknolozi ki'n avanse ki'n annan dan nou pei, ki mon krwar i enportan. Me letan nou pe get Lalwa si Lalwa ozordi ki pe vin devan ek bann lamannman ki pou fer ki Sesel nou osi nou vin azour avek lezot pei nou vin en pe pli vizilan, nou vin en pe pli responsab an relasyon avek bann demars e bann krim ki pase avek *cybercrime*, *cybercrime* mon pa krwar i annan difikilte.

Me sa ki enportan pour nou osi konsyan ki mon kontan ki'n ganny mansyonnen se letan i konsern nou bann zanfan, e mon krwar letan i konsern zanfan nou tou koman bann Seselwa responsab ki konsern.

Be mon mazine kekfw letan nou koman en Lasanble nou pas sa bann Lalwa mon krwar i enportan prezan pour nou sey rod en fason pour nou enkorpor li dan osi dan *syllabus* lekol par egzanp, kot bann zanfan letan nou pe koz *cybercrime*, kwa ki nou enkorpor dan *syllabus* pour nou eksplik nou bann zanfan ozordi la realite lavi avek teknolozi ki nou pe viv ladan ki bann sironstans ki ou kapab vwar ou ladan.

Dan lekol segonder par egzanp, kot i annan bokou zanfan ki servi *maximum* telefonn, e ozordi bann lezot teknolozi parey *laptop*, *iPad* pour zot fer zot resers pour zot fer zot *homework* lo la.

Me i osi annan sa konponan nou bann dimoun aze. Madanm Clerk, mon rapel letan bann dimoun aze ti pe ganny dir pour zot aret pran zot larzan dan lanmen, me ouver en kont atraver labank pou ou larzan en pe pli *safe*, parski ou al tir ou larzan dan en labank anba bokou siperveysans olye al pran li kot en bis kot en dimoun i zis kale, e aras ou larzan.

Sa osi ti annan en pe difikilte, parski senpleman nou bann dimoun aze pa ti ankore konpran kekfwa sa bout teknolozi kot i antre. Me ozordi mon asire pou dir *maximum* nou bann dimoun aze ozordi zot osi zot kapab al labank asire ki zot larzan i *safe* lo en kont, e zot kapab tir zot larzan.

So, mon'n antre dan tousala Madanm Speaker, parski mon krwar Sesel nou ptipti an term lemonn wi. Be selman mon krwar nou'n fer en kantite an relasyon avek teknolozi atraver nou bann labank par egzanp *Internet Banking*.

Ozordi si ou anvi fer en peyman ou pa anvi al kot sa *cashier* personelman ou kapab fer li atraver *Internet Banking*, i annan *Juice* ki bann labank i entrodwi pour ou konnen konbyen ou annan lo ou kont konbyen larzan ou'n tire, oubyen ou kapab transfer larzan lo kont ou zanfan si zanmen i annan serten difikilte.

So, tousala i bann keksoz de bon ki teknolozi in anmennen pour nou pei, me selman parey in ganny dir i annan plizyè bann krim osi ki pase ki nou osi koman en pti pei konnen kwa ki nou pe fer, e pour nou dimoun deor ki pe ekout nou ganny bann ledikasyon an relasyon avek sirtou nou bann keksoz personel.

Nou kont personel, nou nimero kont, nou non, kot souvandfwa parey in ganny dir i annan sa *famous jackpot* ki ou'n gannye alor anvoy ou bann detay deswit.

Sa larzan i antre dan ou kont ki mon krwar si ou pa'n aste pou ou ganny en *jackpot* ozordi ou bezwen annan en tiket, si ou napa en tiket ou pa kapab ganny okenn *jackpot* okenn par.

So, tousala i bann *scam* i bann krim ki egziste dan lemonn, pour nou bann dimoun

konpran pou dir pour nou evite antre dan sa bann demagozi krim atraver *cybercrime* teknolozi ki egziste ozordi.

So, alor Madanm Speaker, mon krwar Lalwa ki devan nou i kler e Onorab Lemiel in fer zoli bilan an relasyon avek ban Lalwa ki devan nou ki bann rezoliman ki annan ladan, e kwa ki nou pe ekspekte avek sa Prozedlwa ki'n ganny prezante par VP.

So, ankor enn fwa Madanm Speaker, mon krwar pou dir Sesel nou lo bon semen an relasyon avek sa e, me selman mwan mon kontinyen met lanfaz lo ledikasyon.

Mon krwar i enportan sa bout ledikasyon pour nou zanfann sirtou dan segonder ek pos segonder, e osi nou bann dimoun aze ozordi ki en pti pe pli zour avek teknolozi kot zot osi zot annan zot *smart phone* ozordi, e letan voyaze zot vwar zot, zot osi kapab pe debourye parey nenport ki zenn an relasyon avek bann keksoz teknolozi.

Me selman parey nou'n dir tousala i annan son bon kote, e i osi teknolozi i annan son bon kote ki'n anmennen pour nou koman en pei, pour nou koman bann endividi. Be nou bezwen toultan pran kont pou dir i osi annan son krim ki vin avek ki

parfwa nou vwar nou, nou tonm ladan.

E sa parfwa i kout nou en kantite larzan oubyen parfwa ou war ou dan bann keksoz ki ou pa kapab sorti, alor avek sa detrwa mo Madanm Speaker, mon ti a kontan montre sipor an relasyon avek sa Proze Lalwa parski nou koman en group Seselwa mon krwar sa ki bon pour Sesel i osi bon pour tou Seselwa, i osi bon pour mwan e sirtou koman en paran ki annan zanfann parey plizyer nou la anndan. E avek sa detrwa mo mon ti a kontan remersye ou Madanm Speaker.

MADAM SPEAKER

Mersi. Onorab Grandcourt.

HON ALVIN GRANDCOURT

Bonzour Madanm Speaker. Bonzour Vis-Prezidan avek ou *panel*. Bonzour tou Manm Onorab, e tou dimoun a lekout.

Ozordi mon eksprim mon sipor pou sa *Bill* ki'n ganny met la devan nou son lamannman. E mon kontan mazine pou dir sa lepok *digital* i anmenn bokou loportinite pou inovasyon, devlopman ekonomik, e konektivite.

Me i osi anmenn bann *risk* par bann menas *cyber* ki depas frontyer ki kapab afekte sekirite

nasyonal, e met an danze lavi prive ek sekirite nou sitwayen.

Nou Lalwa aktyel *Cybercrimes and Other Related Crimes Act 2021* ti en gran pa devan. Me teknolozi i evolye, e i pe evolye tre vit, e bann kriminel osi zot adapte.

Alors i fer ki nou bezwen azir, sa *Bill* i rod anliny pou anliny nou Lalwa avek *Budapest Convention* ki se prensipal trete enternasyonal lo *cybercrime*.

Sa pou ranforsi nou kapasite pour kolaborasyon global, parski *cybercrime* napa frontyer en *hacker* dan en lot pei i kapab fer dega mil, mil de lwen.

San kolaborasyon enternasyonal nou zefor pou fer reste Lalwa i reste linite. Madanm Speaker, amannman i propoze pour amelyor konsistans ek klarite dan Lalwa, i donn en mekaniz pour li solid pour lanket e pourswit, i fer fasil kolaborasyon trans frontyer pou asire ki Sesel pa reste izole dan lalit kont *cybercrimes*, i ankouraz lapros sekirite *digital*, protez dimoun, biznes ek sistenm Gouvernman.

Komite in egzamin sa *Bill* in trouve ki konstitisyonnel man i korek, i respekte nou drwa fondamantal pandan ki

donn lotorite bann zouti nesaser pou konbat bann menas sofistike.

Mon bann Onorab Manm *cybercrime* i pa en menas lwen i la, e i pe grandi. Sorti dan fon finansyel, vol lentite, lasonmwar ziska atak lo lenfrastruktir kritik, e son konsekans i grav.

Par pas sa *Bill* nou anvoy en mesaz kler, Sesel pa pou vin en refiz pour bann *cybercriminals* nou pou protez nou sitwayennte, nou biznes, e nou lentere nasyonal.

Avek sa mon demann tou Onorab, pou soutenir sa *Bill* annou ansanm konstrir en lavenir *digital* pli an sekirite pour nou pei. Mersi Madanm Speaker, mersi tou dimoun.

(APPLAUSE)

MADAM SPEAKER

Mersi. Onorab Trevor Louise.

HON TREVOR LOUISE

Bonzour Madanm Speaker. Bonzour VP ek ou delegasyon. Bonzour tou Manm koleg Onorab, tou dimoun ki a lekout.

Madanm Speaker, petet avan mon komanse si ou a permet mwan mon ti a kontan pou pas mon senser kondoleans a lafanmir Nicola,

ki'n perdi enn zot pros dan distrik Bel Air, ensi ki lafanmir Simeon, ek Arissol. *Ok.*

Sa *Bill* devan nou Madanm Speaker, i enn ki tre enportan. Parski letan nou pe get son konteni li menm i fer provizyon pour serten lofans bann krim ki pa ti pe forseman ganny ki *cater for* dan Lalwa oparavan, *ok.*

E i la nou pe koz lo par egzantp *revenge porn*, bann *assault* lo bann *miners*, *porn data base*, e nou Sesel nou en pti pei nou, nou ganny enpakte en kantite par sa ban kalite krim koumsa par egzantp. Nou'n vwar plizyer repriz ki i annan bokou *videos* ki sorti, e letan i sorti i sorti en gran nonm bann *videos* kot bann zenn fiy i ganny filmen, i ganny *share* partou lo *Facebook*, lo *WhatsApp*, e en kantite dimoun i dir "anvoy mon, anvoy mon, anvoy mon or mon a gete."

San realize ki lenpak lonterm ki sa lan i kapab annan psikolojikman lo sa zenn fiy, e menm son bann manm fanmir. I annan en kantite krim ki ganny komet ki pa ti en forseman ganny *catered for* anba *the previous Act*. Par egzantp, avek modernizasyon *ok*, bann *devices* ki nou war par egzantp telefonn, *laptop and whatnot* i annan en kantite

krim ki ganny komet *online* ki dimoun ki sirtou bann zenn i servi en kantite.

Par egzantp, ou vwar i annan bokou lavant drog ki ganny fer *online ok*, espesyalman ban *dealers* ki pe atrakte bann zenn, e zot *text* sa bann zenn manrmay, "*Hi*, mon annan tel keksoz mon kapab pe vann." E manrmay i *share* antre zot kanmarad, e zot met plan pour zot kapab al aste. Ou vwar sa en kantite.

Ou vwar lo kote par egzantp, *the banking sector* i annan en kantite dimoun ki perdi larzan atraver bann lofans bann krim ki ganny fer *online*, ou vwar par egzantp ban frod ki ganny fer, ou war *identity theft*, ou vwar *bullying*, ou vwar *harassment*, e mon swete ki sa Lalwa li menm i a kapab pran kont sa.

E nou'n koz lo lartik (16) "*Right to dignity*". Me *it goes beyond this* en, i al an deor sa. Parski i annan en kantite nou bann miner ki pe ganny servi pou fer serten aksyon, serten akt seksyel ou menm lezot lofans atraver *social media* ou bann lezot *platform* ki nou pe negliz menm "*The rights of miners*", anba Lartik (31) nou Konstitisyon.

Ok, parski nou bann miner i ganny proteze anba

lartik (31) nou Konstitisyon, e i enportan osi ki nou pran kont par egzanp keston ki mon kapab met devan VP avek son delegasyon, se dan evantyalite ki en miner i, akòz nou tou nou konnen ki *statutory rate* i par anba en serten laz 15an-16an mon mazin 16an an desandan.

E si annan par egzanp, de zenn ki pe fer zot aksyon seksyèl or e zot filmen, e zot *share*. Ki mannyer eski zot pou ganny *deal* avek, si zot pou ganny enkorpoze anba sa Lalwa?

E menm i annan bann zenn ki bann miner ki bokou pli zenn ki sa laz 12an ki parfwa Lalwa i rekonnet zot koman bann ki *legally incapable of committing offences*. So, ki mannyer eski zot pou tret sa?

E osi nou'n koz lo bann adilt ki tant soule abiz ouswa *assault* nou bann miner, e la nou pa pe mazin zis fiy en, nou pa'n dir *rape* nou'n dir *assault* akòz i annan garson osi ki kapab ganny *assault* atraver bann akt seksyèl.

So, eski sa Lalwa letan i pou vin anfers i pou osi, mon konnen ki nou'n fek pas sa *Mental Health Bill* i pou osi fasilite soule serten demars pou asire ki annan en swivi psikolojik ki vin avek atraver

bann demars ki zot pou fer pour nou bann dimoun ki enpakte?

E *mind you* isi Sesel parey mon'n dir oparavan i annan en kantite dimoun ki annan bann *videos* bann ki ganny *share*, letan i *share* parey mon dir i sorti en kantite zot annan en kantite sa bann *videos*.

I annan dimoun ki gard sa lo zot *computer* or zot *store* li *somewhere* lo zot *device* ki a serten pwèn apre zot zis re large en kantite fwa ou vwar sa, parski sa bann *videos* ler i sorti i sorti en kantite. So, i annan dimoun ki aktyelman *store* sa bann *videos* e mon kontan pou vwar ki sa *porn database* pe ganny konsidere anba sa Lalwa.

An 2020, an Avril 2020, ti annan en case ki ti sok Sesel an antye kot ki nou ti vwar ki 75 fiy. Ok, 75 fiy an 2012 a 2019 ti ganny *led through Facebook* ouswa lezot *social mediums* pour kapab i ti ganny abize par trwa msye, e sa ti en case ki ti sok en kantite dimoun nasyonalman.

Now nou, nou pe koz lo 75 dimoun ki'n vin devan ki Lakour in rekonnet. Me dapre lenformasyon osi ki ti sorti i posib ki as far as 200 zenn fiy ki ti ganny *assault* a sa letan, abize.

E sa i montre ou zis enn bann fason ki mannyer *social*

media i kapab ganny servi pou detri lavi dimoun, i sipoze ganny servi dan en fason ki bon. Me selman malerezman i annan dimoun ki *take it to a whole other level*.

E *in terms of the convention* parey VP in dir sa Lalwa presedan pa ti pe forseman pran kont *revenge porn, assault* osi lo bann *miners*. E *revenge porn*, nou vwar ki annan bokou fwa ki annan bann *partners* ki par egzant ki dan zot bann aktivite ki zot fer zot tant pou letan zot kite avek en dimoun *share* sa bann *videos* e partaz li partou *out of frustration or anger*.

E bokou fwa malgre zot ti pe ganny anmase anba *Penal Code* i pa ti forseman annan en provizyon ki ti pe *cater for* sa bann kalite *issues* koumsa, e mwan mon pou donn mon *full* sipor sa Lalwa, e mon swete ki avek son lenplimantasyon nou a kapab war en sanzman par lafason ki mannyer keksoz i ganny fer dan nou pei. Mersi Madanm Speaker.

(APPLAUSE)

MADAM SPEAKER

Onorab Gabriel. Onorab Gabriel.

HON CONRAD GABRIEL

Mersi Madanm Speaker. Mon a dir bonzour VP ek ou delegasyon. Mon dir bonzour toumonn a lekout spesyalman bann zabitan Pointe Larue.

Dabor Madanm Speaker, atraver ou avan mon komanse mon ti a kontan senpatiz avek lafanmir Adela, Pointe Larue ki'n perdi enn zot pros Mr Joseph Adela, ki ti en *head teacher* dan ledikasyon, e mon remersye son madanm osi ki'n petet fer mon ariv la sa parkour kot mon ete, i ti mon ansenyan pour matematik.

E osi dan sa laliny mon pa bliy lafanmir Sinon, ki ti osi dan *weekend* an term zot pros. Mon dir zot kouraz Bondye i beni zot konbat sa sityasyon tre difisil.

Madanm Speaker, sa *Bill* devan nou mon panse in vin lo bon moman, i pe montre nou ki sa Gouvernman ki'n vini la i en Gouvernman serye.

Nou'n vwar ti annan serten mankman, e parey VP in dir i en *benchmark* tre enportan pour nou pei pour nou *close* plizyer *gap* ki nou'n idantifye sertenman an egziste dan sa Lalwa.

Mon kontan VP in dir nou sa Lalwa in sorti son kondannasyon e 5an sorti pou vin 10an, ki petet i a dekouraz bann dimoun ki ti pe pratik serten labi or ti pe eksplwat nou

bann zenn lazenes osi byen ki adilt ki'n ganny bokou fer dimal pandan en bon pe letan, e sa in anmenn serten laspe psikolozik, i vin anba en moman osi kot semenn pase nou'n fek pas sa lazournen drwa imen.

E i montre ki bokou pe ganny fer par sa ladministrasyon, bokou in ganny dir, e mon krwar sa Lalwa i reflekte bann konvansyon ki pou ed nou avek bann keksoz enternasyonal i annan en bann sanzman kler, e ki pou fer sir ki annan konsistans.

Madanm Speaker, mon osi mon distrik i pa'n ganny eparnye ek bann dimoun ki'n pas atraver bann labi nou'n vwar kot bann msye ki'n eksplwat bann zenn fiy dan *uniform*, kot finalman in kree en serten leta lespli pou sa bann dimoun ki vreman dekourazan.

E mon krwar avek sa bann antite ki pe ganny anforse *FIU*, Lapolis lezot bann sistenm legal ki pe ganny met an plas, i a dekouraz sa bann tel aksyon.

E bann *law enforcement*, osi i ava travay de pre ek Gouvernman pour nou kapab tackle tou sa bann sityasyon, petet la en pti kestyon petet *VP* zis dir nou ki bann *policy*, e bann *Crime Unit* eski zot pou

ganny en formasyon ekstra pour kapab *deal* ek sa bann issues kot aktyelman i ti pe vin tre alarman kot i annan *aiding and abetting*.

Bokou in ganny fer nou rekonnet ki bokou in ganny fer par lotorite, i annan bann advert ki ti pe komans sirkile, mwan mon ti a *wish* ki sa bann *advert* i kontinyen pou sansibiliz dimoun pour nou kapab met en lafen, si pa met en lafen olye amwen zis redwi tou sa bann sityasyon.

E mon kontan osi *VP* in anons sa zafer *anonymous* ki ler ou gete i annan dimoun ti pe fer sa en fars en zwe, e mon krwar avek ranforsisman sa Lalwa nou a kapab met anba kontrol en pe tou sa bann keksoz.

E sa kad legal i ava vin pli serye. *VP* in nonm en *SFA*, *FIU*, *FICU*, lot bann antite, e mon demann bann dimoun *out there* adilt annou et pli responsab anver nou bann miner, nou bann manrmay ki pa zoli ditou.

Parey mon'n dir i kre en leta mantal, nou'n fek pas lo en *Bill* semenn pase e mon panse avek tou sa ki mon bann lezot koleg in kontribye nou ava ede kot nou pou annan en sosyete en pti pe pli azour, e nou pli konsernen avek lavenir nou pei. Avek sa de mo Madanm

Speaker, mon a dir ou mersi.
Thank you.

(APPLAUSE)

MADAM SPEAKER

Onorab Woodcock.

HON WAVEL WOODCOCK

Mersi Madanm Speaker.
Bonzour tou mon bann koleg, e
tou dimoun a lekout. Madanm
Speaker, i pa fer premye fwa ki
en tel Lalwa annefe en tel *Bill* en
tel lamannman i vin devan nou
Lasanble.

Ozordi nou pe koz lo
*Cybercrimes and Other Related
Crimes*. Parey bann enterven
ki'n pran laparol avan mwan in
dir *cybercrime* i *borderless*, i pa
ganny *confined* zis *within the
borders* of nou pei Sesel.

Me i en keksoz ki dan
lemonn antye annefe lo *internet*
i *online*, e i pe ariv partou dan
lemonn e menm Sesel enn ler a
risk of bann *threat* ki sorti dan
bann lezot ziridiksyon, dan
bann lezot dan bann lezot pei.

E la mon war ki nou
annan ozordi *largely is quite
effective*, me selman parey nou
konnen *cybercrime* i en keksoz
ki toultan pe evolve, e i annan
bann nouvo *threat* modern ki
tanzantan pe *arise*, i annan
bann nouvo sistenm, nouvo
app, nouvo *malware*, bann

nouvo viris ki pe ganny kree, e
ki nou koman en pei nou
bezwen met nou azour e toultan
pe evolve, toultan pe amann
nou Lalwa pou met li osi azour
avek bann diferan standar, e
bann norm enternasyonal.

By aligning sa nou
Seychelles Cyber Act Crime avek
sirtou *obviously* rezondet ak
sa *Bill* i devan nou ozordi, se pli
zou mwen *align* nou *Act* sa
Lalwa avek the *Budapest
Convention*.

Mon pa pou al an detay lo
la aköz bann Manm in deza
tous lo sa size. So, *aligning by
this alignment* par adopte en tel
amannman i annan bi pou
strengthen korperasyon
enternasyonal dan sa lalit pour
konbat kont *cybercrime*.

E non selman i en nesesite
legal ki vin avek serten benefis
ek privez ki mon pou tous lo la
en pti moman dan en pti
moman, me i osi i dan lentere
nasyonal, e bann en rezondet
aköz ki sa *Bill* in vin devan nou
sitan irzan, se *obviously* i
annan bann *funding*
enternasyonal ki nou kapab
gannyen atraver *World Bank* si
nou pas sa bann lamannman ki
devan nou ozordi.

So, mon prezimen i en
desizyon en pe stratezik osi. Me
petet lamannman pli enportan
ki mon apresye ki plizyer Manm

in tous lo la, akòz i vreman serye se sa lamannman mon kapab dir en reform kle, se *stronger penalties pour child pornography*.

E nou'n vwar pou dir santans in *increase* sorti 5an pou vin *10 years of imprisonment*, e sa i en mesaz ki nou pe anvoye ki nou pei Sesel nou annan zero tolerans kont okenn krim anver nou zanfann *online* parey Onorab Louise, in dir nou tou annan lamazorite tou bann Manm ki la anndan nou annan zanfann, nou annan zanfann dan nou kominote.

E nou koman bann adilt i enportan, e sirtou koman bann lezislater pou nou protez nou bann zanfann sirtou anver sa bann latak *online*, anver sa bann dimoun malad bann *predators* ki malerezman i egziste dan nou sosyete, e nou konnen pou dir in arive bann diferan ka dan lepase.

E sa Lalwa i osi fer ki sirkilasyon ouswa okenn dimoun ki pe partaz *sharing of child pornography* i pa selman i prezan pe vin *explicitly criminalized*, e i enportan pou nou pran kont sa pou dir sa ki nou pe fer ozordi i en keksoz ki vreman, vreman, vreman enportan e pa zis pas en Lalwa i sitan enportan, me osi ledikasyon pou nou bann

zanfann deor menm at en tre zenn az i enportan ki lenformasyon pe ganny pase deor i en ledikasyon pe ganny fer pour nou bann zanfann of bann diferan *threat* ki nou annan of a bann diferan *predators* deor ozordi ki pe servi internet bann rezo sosyal ki pe servi *Facebook, Messenger, Instagram you name it*, pou prey lo nou bann zanfann.

Annefe Onorab Louise, in fer referans avek *the infamous case* ki ti vreman sagrinan, annefe ki ti sok nou pei kot ti *involve* en *child trafficking ring* labi bann zanfann ki nou ti aprann pou dir apepre en 75 ekek zenn fiy ti ganny abize, i en keksoz ki ouver lizye Seselwa avek bann *threat of cybercrime, cyberbullying*, e menm bann *extortion prohibited visual recording* posesyon bann *indecent materials*, e i ti vreman alarman nou ti war kot ti annan bann dimoun bann adilt *involve* in mansyonn trwa si mon pa tronpe ti annan trwa Seselwa avek de etranze lorizin endyen si mon pa tronpe.

Kot zot ti *involve* dan sa *ring* kot zot ti pe prey lo bann zenn, ki zot fer zot servi bann *fake accounts* e bokou fwa en adilt i kapab fer krwar pou dir i en zenn i enpir sa manrmay servi bann portre pour li anvoy

mesaz enpir lo bann zenn fiy i fer sa bann zenn fiy anvoy bann portre and bann portre en pe endesan apre zot servi sa bann portre pour zot *blackmail* sa bann zanfan pou fer bann aksyon seksyel kot zot abiz sa bann zanfan, e sa i en keksoz ki nou paran nou bann lezislater, e tou Seselwa i bezwen fer sir e bann ansenyan nou pe edik nou bann zenn.

Fodre nou pa per, enn ler i en tabou pour nou koz lo sa bann size, *but it's no longer a* tabou i en *risk* i pe arive la deor kot nou annan sa bann kalite *predators* ki zot pe *target* nou bann zanfan, zot pe *target* nou bann zenn fiy.

E parey in dir konmela zot pa zis *target* fiy, me zot osi target bann garson osi. So, i enportan ki nou protez nou zanfan e sa Lalwa pe ranforsi parey mon'n dir santans, e aksyon sever ki pou ganny pran anver sa bann dimoun ki pe fer sa bann tel keksoz, ki pe distribye bann materyo *child pornography* ouswa pe *illicit* bann zenn zanfan fiy ek garson anba laz.

En lot keksoz enportan ki pe ganny entrodwi dan sa Lalwa, se ki pou fer ki *going forward* si sa Lalwa i pase i pou fer ki Gouvernman pour kapab prosekut en Seselwa ki komet

cybercrimes dan en lot pei, sa nou pe anmenn li lo en lot letap ki mon santi i vreman, vreman enportan.

Nou pe *strengthen* nou *investigative powers as well* kot parey bann Manm in koz lo la, "*Prevention orders pou secure digital evidence.*" Nou tou nou konnen pou dir bokou lo *hacking, fraud*, blansisaz larzan *obviously* i ganny fer atraver bann aplikasyon, atraver ou servi bann *gadget* ki ou kapab servi ou telefonn, ou kapab servi ou *laptop* i ganny *store obviously* lo ou *hard disk*.

E sa Lalwa i fer provizyon pou annan bann *method* pou prezerv pou *secure* bann *digital evidence* e gard li la, aköz se lo sa bann *devices*, e menm lo en *hard drive* konmela even si ou re format en *hard drive* ou *delete it*, i annan bann *app* menm lo ou telefonn osi ou kapab *delete* tou ou keksoz lo ou telefonn, me i annan bann *app* ki ou kapab servi pou *retrieve* pou re ganny bann lenformasyon ki'n ganny *delete*, kekfwa ki bann lenformasyon ki pou ekspoz bann diferan *scam*, bann *fraud or even* blansisaz larzan ouswa bann dimoun ki servi larzan pou fer bann lezot aksyon *terrorism, human trafficking*, e lezot ankor.

En lot keksoz enportan ki sa Lalwa i adrese se lo size, lo en *emerging threats* ozordi. Sa se annefe i en *tool* ki nou tou nou servi. *I mean* i kler i evidan, pou dir menm dan sa Lasanble i annan bokou Manm ki servi *ChatGPT* ler zot pe fer *deliver* zot bann entervansyon dan Lasanble Nasyonal i kler pou dir bokou bann Manm i annan en kantite Manm la anndan ler ou pe ekout zot lentervansyon ou war pou dir zot servi *Chat GPT*, e bann lezot *AI tools*.

Ki napa nanryen mal avek sa, akòz ozordi *ChatGPT*, e bann lezot *tools* i ed nou i enform nou ler nou pe rod lenformasyon ki nou bezwen, i fer li pli fasil.

Me an menm tan *AI*, i osi poz en *threat* vreman serye, sirtou kot i konsern bann *deep fake technologies* kot in ganny servi pou fer *fraud*, e pou *deceive* dimoun.

Ozordi ou kapab servi sa bann *deep fake technologies* ki *technology* ki osi en *AI tool* kot ou kapab imit en dimoun, ou kapab *copy* karakteristik en dimoun, ou kapab *copy mannerism* en dimoun, ou kapab *copy* figir en dimoun, ou kapab pran figir en dimoun met li lo en *video*, ou kapab fer *video*, resaman mon fek war en *video* kot mon'n war *VP* ti pe danse.

So, ou kapab fer en kantite keksoz *use deep fake technologies*, ou konnen i annan en kantite *tool* ozordi ki ganny servi ou kapab fer en *video* pou fer en dimoun fer aksyon ki i pa pe neseserman fer.

So, sa i bann danze ki nou pei pe fer fas avek ki nou tou en kantite nou sirtou nou bann Manm dan Lasanble Nasyonal nou'n fer fas avek bann ka kot i annan bann portre ki ganny manipile, zot osi servi *photoshop* bann *AI tool*, pou fer bann *video* i bann zouti ki ganny servi, i annan serten danze avek ki mon prezimen i bann keksoz ki *obviously* nou bezwen pran kont dan nou pei ozordi ki tou sa bann zouti ozordi i bann keksoz ki pe ganny servi.

I annan son laspe pozitiv, me an menm tan i annan son kote negativ ki nou bezwen fer vreman atansyon avek. E parey bann Manm in dir osi regard an sa *Bill*, i osi *enhance National Cybersecurity* espesyalman *meets* bann diferan *threats* lo nou sistenm Gouvernman, *we have a centralised system*, e *obviously* plizyer nou bann *MDAs* e *more and more* nou bann *MDAs* pe servi i *log in* i form par sa *centralised system*

kot zot kapab akse bann diferan servis Gouvernman.

Annefe dan 7enm Lasanble nou ti fer en vizit kot nou Komite MYSCC, nou ti fer en vizit kot DICT, e nou ti aprann ki toulezour *constantly* i annan bann *threat* lo nou pei.

Enn ler zot pe sey *access* nou bann sistenm Gouvernman atraver ou *laptop* i kapab ganny servi, enn ler bann dimoun i kapab sey *access* sey fer bann *fraud*, sey blansisaz larzan, ouswa sey *access* nou bann sistenm gouvernans atraver nou *laptop* or ouswa en dimoun san konnen in *download* en *film* lo en *pen drive* i vini dan biro Gouvernman i *plug* son *pen drive* san realize lo son *pen drive* i annan en *malware*, i annan en viris lo la, e sa bann dimoun *easily* i ganny akse avek nou sistenm ouswa i pas atraver laport deryer pou li antre dan nou *centralised system*, e vwala kot i kapab afekte.

Zis mazine si en sel kou nou sistenm ki nou pe servi DICT i ganny afekte, en sel kou i blok nou pei nou war nou dan en sityasyon difisil, e in annan bann ka kot dan lepase in arive kot i annan latak *cyber attacks* ki'n arive lo serten labank dan nou pei, in arive.

E tou sa bann keksoz i annan en lenpak lo sekirite nasyonal i kapab afekte nou lekonomi, e i kapab fer en kantite ditor.

E sa Lalwa aki la i pe ede ranforsi donn plis zouti, plis lafors pour ki ozordi DICT nou sistenm nasyonal i ganny plis proteze, e an menm tan ki nou pe get sekirite nasyonal, me nou osi pe get bann lezot keksoz parey *rule of law* ozordi.

Nou pe osi pe get proteksyon nou bann zanfani ki primordyal ki enportan pour nou, ki nou pa pe war bann aksyon lepase sa bann kalite labi lo bann nivo ki'n arive ki ti sok nou parey sa ka kot plis ki 75 zanfani ti ganny abize.

Nou bezwen fer sir ki bann Lalwa ki vin devan nou pei i bann Lalwa ki pou protez nou zanfani nou sitwayen e ki dan lentere nasyonal. Avek sa de mo Madanm Speaker, mon ava ekout bann lezot entervenans e nou VP son larepons lo sa *Bill*, e mon ava pran en desizyon. Mersi Madanm Speaker.

(APPLAUSE)

MADAM SPEAKER

Mersi. Nou ava pran de dernyen entervenans. Onorab Georges, e apre Onorab Henrie.

HON BERNARD GEORGES

Mersi Madanm Speaker.
bonzour Madanm Speaker.
Bonzour Vis-Prezidan avek delegasyon, tou bann Manm Onorab, e tou dimoun ki pe swiv nou.

Madanm Speaker, mon krwar tou sa ki bezwen ganny dir lo sa *Bill*, lo son konteni in pli zou mwen ganny dir. Alors, avek ou permisyon mon pou al dan en diferan direksyon.

Mon premye komanter se pou remersye Vis-Prezidan, pour bomaten fer nou konpran parey nou ti a swete annan en pe plis ki ladministrasyon i ale, ladministrasyon i vini.

Me annan en serten kontinite ant enn avek lot, e in fer nou konpran sa tre byen dan sa enn *Bill* ki ti'n ganny aprouve par Konsey de Minis *Cabinet* Gouvernman Ladministrasyon *LDS*, e ki'n ganny soutyen e sipor *Cabinet US*.

E se koumsa ki nou ti a kontan nou lo sa kote latab vwar ki en Gouvernman i siksede en lot Gouvernman, i malere pou dir ki deplizanpli apard sa enn legzanp nou vwar en lapros konpletman diferan kot sa enn Gouvernman i paret ki i annan de bi enn se fas sa ki Gouvernman presedan in fer, e lot se anvers desizyon Gouvernman presedan, e rod sa

ki sa Gouvernman swadizan dapre zot in mal fer.

Nou vwar sa atraver plizyer desizyon ki'n ganny pran bann lanket ki pe ganny komanse, e bann Lalwa ki piu vini dan sanmenm sa semenn ki pe anvers desizyon ki Gouvernman avan ti pran.

Alor parey mon'n dir en pa pozitiv i en pti pa pozitiv ler nou vwar ki annan en lespri kontinite ant en Gouvernman avek en lot parey nou vwar dan sa enn *Bill*, e parey nou ti fer Minis Finans Mr Pierre Laporte, rapel ler i ti vin devan Lasanble avek *Mid-Term Review*.

En Gouvernman i bezwen batir lo sa ki sa ki sa enn presedan in kite, e dan sa dan konteks sa enn *Bill* devan nou, nou vwar ki se efektivman sa ki sa Gouvernman pe fer, in gard tou bann aki lo sa enn avan e i pe amelyor li, e i pe anmenn serten nouvo keksoz tel parey proteksyon *copyright* par egzanp ki ti egziste anba *Copyright Act*.

Me prezan i ganny li en nouvo ledan en nouvo posibilite protez *copyright* ki dimoun i annan anba sa *Cybercrime and Other Related Crimes (Amendment) Bill*.

Donk pour sa mon ti a kontan e mon ti a kontan dir ki nou soulaze ki i annan

kantmenm dan lobskirite en pti git lalimyer.

Madanm Speaker, dezyenm keksoz ki mon ti a kontan tous lo la bomaten se Konvansyon Budapest ki nou'n mansyonnen a plizyer repriz, ki fondman sa Lalwa lo *cybersecurity*, annefe se sa lentansyon *Budapest Convention* ki ti ganny ratifye par Lasanble 7enm Lasanble, e ki'n komans sa proses pou anmenn nou kot nou ete la ozordi.

E annefe sa ki nou vwar la atraver *Cybercrime and Other Related Crimes*, se en domestikasyon *of the Budapest Convention*.

Tel parey tou Gouvernman demokratik, e tou Gouvernman ki annan langazman *the rule of law*, e ki angaze pour li siport bann konvansyon enternasyonal ki i sinyen i annan devwar pou fer.

Alor, sa Lalwa ki devan nou pour tou sa bann rezon e parey nou'n tann tou dimoun dir bomaten i en Lalwa ki merit sipor tou lede kote lata, e nou aköz i al dan en bon direksyon.

E non selman sa, me set en keksoz ki nou tou nou kapab partisip ladan, aköz *cybercrime* i en keksoz ki tous nou tou, e i annan kapasite pou tous nou tou.

Mon kontan vwar ki sa enn Lalwa en pti pe parey Lalwa ki annan pou fer avek Lakour Penal Enternasyonal, i donn nou en *extra territorial capacity*, setadir ki nou kapab swiv en lofans ki ganny komet dan en lot pei oubyen swiv isi, oubyen en lofans komet isi dan en lot pei, oubyen swiv isi en lofans ki'n ganny komet dan en lot pei.

Donk i annan sa *extra territoriality*, aköz i bezwen *the worldwide web* parey son non i dir *is worldwide*, nou pa kapab annan en ziridiksyon ki pa kapab koz avek lezot.

Donk pour tou sa bann rezon sa Lalwa i performan, e mon kontan ki Sesel in pran sa pa pou anmenn sa Lalwa devan nou la ozordi, ti en Lalwa ki nou anfen mwan an partikilye ki ti *Leader of Government Business* sa lepok ti annan en kantite sansibilite pour li, e mon'n angaz bokou avek Vis-Prezidan, avan pou fer sir ki *the Budapest Convention* i ganny ratifye, e ki bann keksoz ki de koul atraver *the Budapest Convention* i ganny met an operasyon.

E mon kontan pou vwar ki in sa in arive, e ou a permet mwan Madanm Speaker, a sa moman pour mwan an partikilye remersye en lorganizasyon ki apel *Parliamentarians for Global*

Action PGA, ki'n anmenn en kantite sipor pour Gouvernman Sesel, e pou Lasanble pour bann Manm Lasanble, e sirtou pour bann Manm PGA dan sa Lasanble pou pous sa konvansyon devan, e pou fer sir ki sa Lalwa i arive.

E i kontinyelman ganny parey Vis-Prezidan, ti dir bomaten, aköz sa nou dan en *field* ki dinamik, e i kontinyelman ganny *updated* pou fer fas sa bann realite ki arive toulezour.

Dan sa konteks mon ti a kontan an partikilye remersye en msye ki apel Mr Peter Barcroft, ki en travayer *Parliamentarians for Global Action* ki ti pran sa koman son devwar pour li ed Sesel, ed bann Parlmanter dan 7enm Lasanble pou fer sa travay ki nou ti fer *including* en *workshop* ki i ti fer ki Lasanble ti partisip avek isi menm Sesel, e ki ti anmenn plizyer Manm dan bann lezot pei dan bann lezot *workshops* pour nou aprann en pe lo sa ki savedir *the Budapest Convention*.

Vis-Prezidan, bomaten in osi mansyonn konsey Lerop, e mon kontan ki'n fer sa e mon ti a demann li Vis-Prezidan si nou pa ankor fer annou anvoy, annou reponn sa lenvitasyon ki *Council of Europe* in fer pour

nou kapab ganny tou bann benefis ki nou gannye anba sa konvansyon, aköz Konsey Lerop se li ki enn paren *The Cybercrime Convention*.

E *unlike* tou bann lezot konvansyon se pa nou ki ratifye sa konvansyon, me se *Council of Europe* ki envit nou pour nou fer, e atraver sa lenvitasyon nou pou ganny en kantite sipor atraver *Council of Europe* mon konnen zot pe espere, aköz zot in swiv progre Sesel tre pros, e zot pe espere ki sa i ganny fer dan en fason ki nou kapab ganny *training capacity building* ek finansman pour nou kapab met sa bann keksoz an operasyon.

Alor, Madanm Speaker, mon'n koz koumsa pou montre ki sa ki nou pe fer la ozordi i al bokou pli lwen ki nou, i al bokou pli lwen ki sa Lasanble, i al bokou pli lwen ki sa Gouvernman.

Me i en keksoz ki bann Gouvernman siksesiv pou bezwen fer fas avek, e koman en dernyen parol bomaten, mon ti a kontan lans en lapel avek tou bann Manm Lasanble lo tou lede kote latap pou *join Parliamentarians for Global Action*.

Onorab LGB, avek mwan nou tou lede nou en Manm, e mon konnen ki mon kapab fye

lo son sipor pour nou *recruit* otan Manm ki posib i en lorganizasyon ki la pou ed Parlmanter dan travay ki nou fer, tel parey sa.

Me osi dan bann lezot aktivite, e kot nou kapab ganny non selman bokou sipor, me osi bokou loportinite pou vwayaze, e pou *attend* bann konferans partou san ki kout nou Lasanble en sou.

E mon ti a kontan, mon ti a kontan ki ler nou'n kapab ganny sifizaman Manm, ki nou kapab annan en group Parlmanter PGA isi dan sa Lasanble.

Alor Madanm Chair, nou'n vwar, eski mwan. Madanm Speaker, nou'n vwar ki mannyer sa ki nou pe fer la ozordi parey mon'n dir i pa selman *ownership* en Gouvernman, me i pa *ownership* en pei non pli sa, e i pa *ownership* en lorganizasyon non pli.

I annan bokou lorganizasyon, bokou pei tou bann pei annefe, e bokou Gouvernman ki enterese dan sa travay ki nou fer, aköz sa travay ki nou pe fer la ozordi i en travay absoliman global.

Mon ti dir ki sa se mon dernyen parol ou ava eskiz mwan si mon azout en lot, e

mon bezwen felisit bann *drafters* sa *Bill* pou en rezon.

Mon vwar ki zot pe *move* ver en langaz enklisiv, en langaz modern nou pa war bokou *shall* dan sa Lalwa, nou war plito *must*, e sa se bann nouvo fason drafte ki vin- ki en langaz popiler olye bann "*herein to for and hereinafter, notwithstanding,*" ki bann parol avoka.

Mon kontan vwar ki sa ki nou pe fer dan sa enn lamannman se servi en langaz bokou, bokou pli modern dan en fason ki pou en Lalwa ki difisil pou konpran *at least* i ava a laporte bann dimoun ki pa neseserman annan en *training* Lalwa.

Alor Madanm Speaker, avek sa detrwa mo mon ti a kontan remersye ou pour lefet ki ou'n donn mwan laparol, e pou asir nou popilasyon ki lo sa kote latab nou osi nou vizilan, e nou fer sir ki bann Lalwa ki pase i bann meyer Lalwa ki nou kapab gannyen. Mersi bokou.

(APPLAUSE)

MADAM SPEAKER

Mersi Onorab. Nou pou aktyelman annan ankor de dernyen entervenän. Onorab Henrie, apre Onorab Loze.

HON GERVAIS HENRIE

Mersi Madanm Speaker. Mon ava dir bonzour tou dimoun. Madan Speaker, pour piblik ki pe ekout nou ozordi bomaten mon ti a voudre zot pran detrwa segonn, e reflesir ki mannyer zot lavi, nou lavi i santre otour teknolozi e bann platform nimerik.

Mazinen ki mannyer ou zanfani i swiv e soumet leson *online*, ki mannyer parfwa ou war ou partner ler ou pe prepare pou al travay bomaten li i ankor kot lakour ou demann li ou dir, “be ou pa al travay ozordi?” I dir ou, “non, ozordi mon pe *work from home*.” So, i soumet travay an servan *internet*, e menm parfwa i fer *training online*, e bann konferans atraver le fame *Zoom*.

Ki mannyer biznes i soumet aplikasyon *online* atraver plizyer bann lorganizasyon Gouvernman ki n met sa bann fasilite an plas? Ki mannyer bann lakonpannyen i *market* zot prodwi *online*? Konmela apenn si ou kapab regard en video ki pa ganny koupe avek en pti piblisite dan milye.

E se sa lavites ki sa pe vin avek. Ki mannyer bann lakonpannyen i kolekte reveni *online*, e ou menm koman

endividi ou kapab fer peyman *online*?

Now, si ou n fer sa refleksyon setadir ou ava dakor avek no dan Lasanble ozordi ki pe diskite lo lamannman ki devan nou, ki nou lavi pe ganny fasilite en kantite, e vin pli mye pli vit, pli konvenab atraver sa bann teknolozi, e *platform* nimerik.

Me tou keksoz ki byen i annan son *risk*, sa i lot kote sa konny. Alor, i annan bann *risk* ki pou vin ver ou menm ler ou pa swete, alor i byen ki i annan Lalwa ki pran kont pou dil avek bann lenstans kot ou kapab fer fas avek serten difikilte.

Alor, vwala kot sa lamannman i vini ozordi. Me pou ou ki pe ekoute, i enportan ou konnen pou dir in annan en listwar sa Prozedlwa in annan en listwar, e Lasanble Nasyonal in trouv li o sant sa zistwar.

Anfet, si nou pran kont depi an 1998, 17enm Lalwa ki ti pase mon n sey rod son dat presi pour mon kapab etabli si ti dan premye Lasanble ouswa si ti dan dezyenm Lasanble, akoz i ava depan lo ki mwan, nou a rapel premye Lasanble ti ant 1993 to 1998, e dezyenm Lasanble ti 1998 to 2002.

So, mon pa n kapab etabli son mwan. Alor i kapab *either* premye ouswa dezyenm

Lasanble ki ti pase ki ti apel *Computer Misuse Act*.

E *Computer Misuse Act*, epi i ti annan en *famous* lamannman ki ti vini an 2012 an Out 2012, ler i ti annan en Manm Lasanble ki ti enplike dan en skandal en portre pornografi ki ti pe sirkile.

Alor, ti ganny en lamannman pou anmennen pou elarzi sa zafer *computer* menm met *anything* ki ou *store data* parey *pen drive*, fason ki bann porte sa letan ti pe sirkile. Alor, in annan en *story*.

E apre la nou'n ganny sa *Cyber Act*, ki'n vini li an 2021, ki ti ranplas *Computer Misuse Act*, e *basically* ki sa Lalwa i fer se ki i dil avek tou bann keksoz ki bann menas modern nou apel sa, par egzanp *fraud* nimerik, vol idantite bann ar selman nimerik i ranforsi defans nimerik bann lorganizasyon.

Alor, lamannman ki devan nou ozordi i pe amann Lalwa egzistan savedir sa enn la ki nou ti pase an 2021, pou fer li pli modern ouswa parey nou pou dir nou pe *update* li, i pe armoniz sa Lalwa avek Konvansyon Budapest ki bokou Manm in koz lo la.

Donk, ladministrasyon avan ti'n fer tou le nesesser, e ladministrasyon ki'n fek vini zot

pe fer li vin anliny avek sa Konvansyon Budapest, akoz i annan sa konponan *funding from World Bank*.

Donk, i en kontinite e mon apresye sa remark ki *Leader* Lopoziyon, in fer dan sa zafer Gouvernman e ladministrasyon.

E petet ti ava byen koman en langaz Parlmanter pour nou plito servi ladministrasyon, Ladministrasyon LDS, ki ti avan Ladministrasyon US, ki la.

Me Gouvernman Sesel li i kontinyen, setadir *DICT* ki'n travay avek ladministrasyon avan i kontinyen travay avek ladministrasyon ki ozordi.

Donk, i annan bann Prozedlwa ki kontinite i *build on what the country in already* mete koman fondasyon, e nou pa kapab *claim* ti pou sennla ouswa pour sa lot. Me kot i byen nou siporte, e kot i mal nou ede pou anbelir.

Alor Madanm Speaker, enn bann keksoz ki enteresan dan lavi enn bann keksoz ki enteresan dan lamannman ki vin devan nou la se ki, ki mannyer si en krim in ganny komet dan en ziridiksyon aprezan nou kapab kolabor avek lot ziridiksyon pou asire ki bann koupab i ganny anmenn devan lazistis, e ki alor nou

kapab konbat bann krim nimerik.

So, nou pe *keep paste* avek devlopman teknolozi, me selman sa ki osi enportan akòz sa bann lamannman i vini, akòz koman en pei nou pe met diferan striktir an mars.

Par egzanp, i annan *Seychelles FinTech Strategy*, nou osi annan lazanda ouswa nou lanbisyon nasyonal koman en pei pour nou *go ver* lekonomi nimerik.

Donk, si nou pe fer sa i enportan ki annan sa Lalwa pou ou kapab pran kont tou bann sityasyon ki nou fer fas avek, e ki mannyer nou dil avek sa.

Alor, pour ou sa sitwayen ki pe ekoute ki mannyer ou vwar ou ladan? Parey mon'n dir nou lavi i trou nou tour bann *platform* nimerik, e demen bomaten ou kapab fer fas avek en sityasyon ki ou pa ti'n prevwar.

Semenn pase mon al dan en labank mon pa ava mansyonnn non sa labank zis pou pa fer son bann kliyan per, me ler mon laba mon zwenn en zanmi La Rivyer Anglez, e i dir ek "mon annan en problemm mon bezwen vin rezourd, akòz 4er bomaten letan li pe dormi son telefonn nek i pe al, *ttttt*." Letan i leve i regarde son larzan

in tire lo son labank, lo son kont.

E in bezwen vin labank pou sey *sort out*, e ti annan plizyer kliyan osi ki ti la sa zour, mon pa ti la pour menm rezon erezman.

Me in arive ki zis larzan in ganny tire kan li i ti ankor pe dormi 4er ekek bomaten. Menm zafer de *weekend* pase, en zenn fiy i kontakte mwan akòz i pe sey rod kontak avek en fanmir pou sey rezourd en problemm pour li, kot en zenn koup ki nepli byen dezormen.

Me *former boyfriend* in pran portre in kree en nouvo *Instagram account*, e zis pe anbaras sa fiy avek portre ki pe sirkile ouswa bann *friend request* ki ti pe anvoye.

Alor, ou ki sa sitwayen ki pe ekout mon atraver sa bann sityasyon ou kapab vwar ou dan en sityasyon kot demen bomaten ou kapab *fight*, ouswa ou lidantite i ganny konpromize ki met ou dan en sityasyon anbarasan e menm an domaz ou repitasyon, e koz troma parey plizyer Manm in fer resorti.

Donk, pa bezwen krwar pou dir ou detase avek sa ki nou pe fer bomaten. An terminen Madanm Speaker, mon rekonnet travay ki diferan lorganizasyon pe fer pour asire

ki koman en pti leta zil nou annan bann striktir enportan pou ed nou sirvey tou nou bann aki, ki kapab ganny konpromize atraver bann krim nimerik.

E la mon rekonnet, e dir mersi tou bann dimoun ki pe fer sa bann travay. Par egzanp, i annan *National Cybersecurity Coordination Committee* ki the *central organisation* ki dil avek sa bann zafer.

I osi annan *Unit Cybercrime*, dan lapolis ki'n ganny *set up* depi an 2023, avek led *Interpole*, zot deza pe fer en kantite travay pou ed bann lezot *Unit Lapolis*.

Par egzanp, *Commercial Crime Unit*, *SID*, avek *Family Squad*, i annan osi *Computer Emergency Response Team of Seychelles*, ki ganny kordinen par *DICT*, e apre *byen Central Bank* i fer en kantite travay.

Donk, mersi pour tou sa bann dimoun ki enplike dan sa bann travay. Letan mon fini i annan sa bann keston swivan ki pour mwan mon pe poz mon lekor, e mon ti ava apresye si panel i reasir nou lo serten keksoz.

Donk, Lalwa ki devan nou, lamannman ki devan nou ozordi nou war pe ranforsi pinisyon pour bann koupab. Sorti 5 pou vin 10an sa i tre

byen, i en pilye parmi lezot pilye ki mon krwar i osi enportan.

Me *what about* sipor pour viktim? Demen bomaten mwan mon leve mon viktim en *identity theft*, ouswa en viktim zot in pran mon larzan, ki mannyer mon ganny sipor? Akoz sa dimoun ki pe ekout nou laba deor i enportan pour li konnen kote i al tap laport, kote i sey rod son rezon.

E dernyen pwen lo keston sipor sa bann pilye, responsabilite bann platform. Ozordi bokou Seselwa i lo bann platform ki nou pa zer Sesel. *Facebook* pa zer Sesel, *Instagram* pa zer Sesel, *Tik Tok* pa zer Sesel, me souvandfwa se zot ki kontribye pou kree problem dan nou lavi.

So, ki mannyer nou koman en letan souvren nou apros sa bann lorganizasyon enternasyonal, e sey negosye avek zot. Mon pe dir sa akoz serten pei in kapab pran bann desizyon.

Singapore i enn sa bann pei, e Lostrali par egzanp, sa ki Onorab Hoareau, ti pe koz lo la bomaten pou anpese ki manrmay 16an e mwens pa al lo bann platform parey *Facebook*, i en desizyon ki en pei ki'n pran. Akoz li *Facebook* i permet ou *by the age of 13* ou kapab annan en *account*.

Me en pei i vini i dir, “non, mon pe protez mon bann zanfan si ou napa 16an ou pa pou al lo la.” So, ki mannyer nou koman en pti leta zil nou osi kapab negosye avek sa bann pei?

E si pou al en pti pe pli lwen par egzanp, i annan ankore sa bann *platform* ki fer biznes dan nou pei, me zot pa pey en sou *tax*, *booking.com* par egzanp, konbyen Seselwa ki al vakans, e boukte atraver zot nou peye be li i baze Oland, pa pey nou *tax*.

So, konbyen larzan ki pe sorti dan nou lekonomi, e pe anrisi en lorganizasyon enternasyonal ki zot pa pey *tax*, e la ankore parey mon pe dir zot sa bann *platform* nimerik zot kapab kree en serten problem pou nou.

E menm letan mon lo sa size responsabilite bann *platform* Madanm Speaker, ozordi nou konnen i annan diferan bann group *Facebook*, ki bann administrater e Seselwa, e zot apel zot lekor en non barok ki mannyer nou apel sa bann *fake account*? Menm mon pa pe koz *anonymous* la mwan, mon pe koz en dimoun i bezwen kree en group e en dimoun fizik ki egziste ki mars parmi nou, i apel son lekor en non barok, e menm bann group

WhatsApp i annan en administrater.

Me letan mwan mon ganny *defame* dan enn sa bann group, ki mannyer mon trouv mon rekour, e kote? *And this is the responsibility.*

Responsabilite moral, ladministrasyon dizour pou adrese sa problem, parski nou tou nou kapab vin viktim sa bann dimoun la taler apartir midi koman nou al dan break Madanm Speaker.

So, vwala mon trwa size ki mon ti le panel i donn mwan en leksplikasyon lo la, pinisyon i ok, mon krwar i Lalwa lamannman in adrese.

Me partikilyerman de pwen sipor pour viktim avek responsabilite bann *platform* partikilyerman zot administrater, e bann lorganizasyon enternasyonal. *How*, koman e pei nou dil avek sa sityasyon? Mersi Madanm Speaker.

(APPLAUSE)

MADAM SPEAKER

Mersi Onorab Loze.

HON JOHAN LOZE

Mersi Madanm Speaker. Bonzour Madanm Speaker, Vis-Prezidan, panel e tou kole

Onorab, e tou dimoun ki a lekout.

Madanm Speaker, mon'n apresye pour mon tann Onorab Henrie, koz lo sa size. I annan en keksoz mon pa konnen posibleman bokou dimoun Sesel pa konnen, bokou lannen pase Onorab Henrie, ti ekrir en *blog* lo teknolozi.

Mon konn sa akòz mon ti swiv sa ti bann lepok kot *blockspot.com* ti pe fek lanse ankouraz *citizen journalism*, les tou dimoun ki anvi ekrir en keksoz lo en size.

E Onorab Henrie, li i ti enn bann dimoun ki ti pasyonnen avek sa bann size teknolozi, e i ti aktyelman annan en *blog*, kot i ti ekrir lo sa bann size.

Me selman an dizan sa mon le reasir li ki letan nou pe koz lo sa bann group, nou pe koz lo bann latak wi. Mwan Johan Loze, mon garanti ki ler nou al manze midi la mon pou ganny atake par Ernest son vwar Ernest Songoire. Alors i *ok*, nou pran li mannyer i ete.

Madanm Speaker, size ki devan nou i enn ki demann annan konfyans piblik pour li avans devan. Nou en pei ki annan penetrasyon teknolozik vreman o, tou dimoun i annan en *device* dan son lanmen, i annan bann lakour kot ou kapab annan ou senk dimoun e

ou annan ou sis, set *device* pe ganny itilize dan lakaz.

Be kestyon ki nou poze, eski tou nou dimoun i okouran danze ki sa bann *device* i reprezante pour zot premyerman?

Eski zot okouran danze ki sa bann *device* i reprezante pour zot? Akòz nou servi nou konsonmater, nou bann *end users*. Be eski nou prosed konesans teknik pour nou konpran nivo danze ki nou ladan?

E osi lot kestyon ki pe bezwen ganny demande, eski letan nou pe servi sa bann *device* nou konpran tou nou drwa ki nou prosede koman konsonmater ki pe itiliz, ki pe konsonm sa bann prodwi?

Enternasyonalman in prouve ki i annan *device* ki ekout ou konversasyon, i annan *device products international products* avek bann gro *brand names* ki nou aste sepa konbyen mil rounpi ou met dan ou lasanm ou enstale, e li i ekout ou konversasyon *casually* i la dan ou lasanm *smart tv*, *smart lot*, *smart isi*, *smart laba* i ekout ou.

E ler ou annan bann *key words* ki li in programmen pour li ekoute ou dir dan ou konversasyon i rikorde, e li i anvoy sa kot sa bann

international marketing firms i *basically* vann ou lenformasyon, e apre ou, ou war enn ou *device* pe ganny targete ou pe ganny lavertisman.

Sa ou realize akòz, kot sorti ou kapab lo ou *Facebook* i annan en keksoz ki ou ti pe koze ek ou madanm ou dir sa ti a bon enteresan, annan tel mark loto *all of a sudden* ou war sa mark loto pe monte lo *Facebook*.

Be mon *wonder* a ki pwen eski nou konpran sa ki sa bann keksoz i arive, e i pe arive avek nou dimoun ordiner dan nou lavi toulezour.

E mwan mon pe sey dir sa an sipor pou sa ki Onorab Henrie, in dir ki ou pa separe ou avek lezislasyon ki devan nou ozordi, i konsern ou, i konsern ou dan ou lakour, dan ou lakaz kot ou pe reste.

Akòz si nou ti konpran danze mon krwar napa enn nou paran ki ti pou les nou zanfan dan son lasanm avek en *laptop* ki nou pa'n pran en bout *masking tape* en plaster ouswa en pe lapentir kouver sa *camera* ki lo sa *laptop*. Mon krwar si nou ti konpran nou tou nou ti pou kouver, ouswa nou ti pou kas sa pti *camera* ek *laptop* zanmen nou ti pou les en *device* dan lasanm nou zanfan ki kapab *spy* lo nou zanfan.

Be lezislasyon devan nou i annan en balans enteresan i bezwen fer osi, i bezwen balans ant *law enforcement*, *privacy* avek *basic human rights*.

E sa i enportan pour nou mansyonnen e pour nou kontinyen koz lo la, akòz en kantite bann sityasyon lenvestigasyon *cybercrimes* i antre dan bann domenn kot i *infringe* lo ou *privacy* dimoun, e in menm komans kontourn son drwa imen pour li posed son *ahold* son lenformasyon.

Alors ki fer ki lezislasyon i bezwen annan konfyans piblik, Mr Vis-Prezidan, mon pa konnen si *DICT*, anba ou manda pou bezwen sans en pe son fason sorti, komans koze, komans eksplike akòz zot enn bann *governmental bodies* ki zot travay *quietly* dan zot bann *servers* laba deryer, e nou pa tro tann zot.

Be pou bezwen enspir konfyans sa morso lezislasyon ki devan nou, nou pou bezwen enspir konfyans dan nou pep ki nou pa pe pas en Lalwa ki pou zis vini antre lo zot *device*, fer sirveyans elektronik lo zot, ekout sa ki zot pe dir, e kapte zot bann lenformasyon, e mon krwar *this is the way forward*.

Madanm Speaker, en lot keksoz mon anvi tous lo la sa dernyen Lasanble nou ti pas

Virtual Asset Service Providers Act, 2024 (VASP).

Mwan mon ti koz lo la longman, be selman i annan en keksoz ki ti konsern mwan ler nou ti pas (VASP), nou annan en fason fer Lalwa Sesel nou en, e ki restriktir e restriktan mon kapab dir.

Nou vin avek en lalis dan Lalwa tou sa ki dimoun pa kapab fer, “ou napa drwa fer sa, ou napa drwa fer sa, ou napa drwa fer sa, ou napa drwa fer sa”.

E ki mon konpran, parey la devan nou, nou annan en morso Lalwa ki de koul dan en konvansyon. Be sa bann Lalwa i sorti dan bann landrwa kot i deza annan non selman konsern, me i annan bann lendistri, i annan bann diferan fonksyon, i annan bann aktivite.

Ler nou ti pas (VASP) nou pe restrikte ki keksoz dimoun i kapab fer *cryptocurrency* nou dan en pei kot napa okenn mouvman *cryptocurrency*, napa en lendistri napa, napa nanryen.

E nou pa pe fer nanryen pou ankouraz nanryen, zis nou vin ek en seri, “pa fer sa, pa fer sa, p a fer sa, pa fer sa mon dir ou pa fer sa, pa fer ou tande ki mon’n dir ou.”

So, nou annan sa fason pas Lalwa Sesel, e avan ki menm linovasyon, kreativite i kapab sorti nou’n fini vin avek en seri restriksyon, sa i en konsern personnel ki mwan mon annan koman en lezislater lo bann ler mon ger bann travay ki nou, nou fer dan Lasanble sirtou an relasyon avek teknolozi, e i en konsern ki petet a en serten pwen nou Gouvernman pou bezwen pran en pe letan analize, e sey adrese.

En lot pti keksoz mon le tous lo la se ki, *linchpin* sa morso lezislasyon ki devan nou la ozordi i parey tou bann Manm ki’n koz avan in dir se *Budapest Convention*.

Be an se moman Nasyon-z-ini li i pe pous devan son *Comprehensive International Convention on countering the use of information and communication technologies for criminal purposes*.

So, Lalwa devan nou i *basically* a la baz en konvansyon ki’n ganny *champion* par Linyon Eropeen. Be Nasyon-z-Ini li i pe aport en lot konvansyon devan ki pli konpreansiv, *broder based* ki sa ki sa enn *Budapest Convention* la ki nou Lalwa in *appear* lo la.

Prezan nou Sesel mon en pti pe konsernen petet ki nou

pou pran direksyon sa bann Lalwa Finansyel la *FATF* lot, lot ki tou le 6mwan nou bezwen amande, aranze pour nou pas bann legzanmen ki sa bann dimoun i met lo nou. Nou bann met kolonyal i met lo nou si nou pa pase, zot pa donn nou *correspondence banking*.

Sa i zis en konsern ki mwan mon annan ankore koman en lezislater ki mon anvi met devan Lasanble, e devan piblik Seselwa.

Apart sa VP, serten konsern ki mwan mon annan i bann konsern pratik. Par egzamp, nou bann kontrent resours ki nou, nou annan koman en pti pei.

Funding pou fer *specialised training* teknolozi, *forensics*, *forensics defence*, e pou annan bann *dedicated Cybercrimes Units* dan pei ki'n resevwar formasyon dan tou sa bann keksoz ki mon pe dir la.

E *locally funded* formasyon osi, *in as much as can be*, non pa bann dimoun aletranze ki vini i ofer nou formasyon apre enpoz kondisyon lo nou.

I annan en *capacity and skills gap* lo kote lezislatif osi Sesel ki nou kapab konstate, nou annan nou *shortage of* bann legal *experts* prosekiter vokal ladefans e *law*

enforcement osi ki pou kapab anmenn en *case* devan ki annan *affair* avek sa bann *complex digital investigations* la.

E nou'n vwar dan lepase in annan bann case ki'n vini ki nou sistenm legal pa pe vreman kapab dil avek. So, nou annan en Lalwa devan nou, be eski tou bann lebra nou bann sistenm i an plas pou donn lavi sa Lalwa ki devan nou?

I annan konpleksite bann *jurisdictions*, aköz *cybercrimes* i en *cross border activity* parey in ganny fer sorti par tou Manm. I difisil pou aplik bann diferan Lalwa, i pli difisil pou *extradite* bann *offenders* ki'n dan bann diferan pei pou fer zot vin kot ou.

Espesyalman, letan ki bann diferan morso Lalwa Nasyonal, bann diferan pei pa pe marye ansanm pa pe koz ansanm.

Prezan nou bann lezot Lalwa ki sipoze marye avek sa enn ki, aköz parey Vis-Prezidan in fer nou konpran bomaten sa morse lezislasyon ki devan nou i pa pe kapab debout li tousel, i pa pou fer sans debout li tousel.

Nou bezwen bann lezot Lalwa pou siport li, be nou annan bann *gap* dan nou *framework* kot i annan Lalwa ki konpletman *non-existent* zot pa

egziste, i annan ki *outdated*, e i annan ki vreman *insufficient*.

Apre en lot kestyon osi ki mon anvi poze lo sa, lo nou bann legal *framework* la *data retention capacity*, *both* pa *DICT*. Me zot bann *partners* par egzanp, Lapolis, Lakour, *data retention capacity*, ki zot annan pou prezervasyon levidans.

So, mon'n anmenn enn de pti konsern devan mon pa le pran bokou letan mon krwar sa i senkyenm dan 10 pwen ki mon ti'n touse. Mon pou aret li lanmenm, mon kapab ekri zot *DICT*, avek mon bann konsern pli tar sa, aköz mon pa le pran plis letan Lasanble Nasyonal.

Be i bann konsern serye ki mon'n rankontre an konsiltasyon avek bann lezot partener, bann lezot dimoun ki'n anvi konnen, nou annan en Lalwa devan nou wi. Be son *practical application* ki mannyer pou marse?

E an termin an Madanm Speaker, mon le tous lo zis enn pti pwen. Mon kontan letan Onorab Henrie, in dir annou re fer lo sanzman dan gouvènanans koman bann diferan ladministrasyon ki antre, ladministrasyon sortan.

Be pour en ladministrasyon antre i antre par eleksyon, i pa antre par koudeta, i antre par swa

popilasyon Sesel. E i pa antre dan en nean, i antre avek en plan, e en program.

Si son pla, e son program i pou reverse serten keksoz ki Lepep Seselwa pa'n konfortab avek *then so be it*, sa ti swa sa pep ki apel Seselwa Onorab Bernard Georges. Mersi Madanm Speaker.

(APPLAUSE)

MADAM SPEAKER

Mersi nou ava prezan pran en *break* ziska 2er, e letan nou retournen Vis-Prezidan ava fer son *summing up*. Mersi.

(BREAK)

MADAM SPEAKER

Mon a dir bonn apre midi tou bann Manm, Vis-Prezidan avek ou tim. Nou ava prezan pas lo *Right of Reply* ek *summing up*, Vis-Prezidan?

VICE-PRESIDENT SEBASTIEN PILLAY

Bonn apre midi Madanm Speaker, bonn apre midi *Leader* Lopozisyon, *Leader* Zafer Gouvènanman, bonn apre midi tou Manm Onorab, bonn apre midi tou dimoun ki a lekout. Mersi Madanm Speaker pour donn mwan loportinite pour fer

sa *Right of Reply* an sa ki konsern *Cybercrime and Other Related Crimes (Amendment) Bill*, 2025.

Madanm Speaker premyerman les mwan eksprim mon - si oule mon lazwa pour vwar ki nou'n annan en deba e ki in annan en *buy in* Lasanble Nasyonal petet a leksepsyon enn de Manm ki'n dir zot le ekout sa *right of reply* avan ki zot pozisyonn zot lekor kot zot vote.

Byensir parey *Standing Orders* i prevwar okenn Manm pa bezwen forse pour li vot *according to* okenn fason - i depan lo li sa Manm pour li vote baze lo lenformasyon ki ganny prezante devan li e mon swete ki apre ki mon'n fini prezant bann lenformasyon e donn bann larepons pour bann kestyon ki'n ganny souleve, mon ava kapab konvenk menm sa bann Manm ki'n dir poudir zot pou pran zot pozisyon a sa moman.

Premyerman Madanm Speaker in annan en kestyon pertinan ki'n ganny souleve par *Leader* Lopozisyon an sa ki konsern aksesyon avek *Protocol Budapest*. Mon le enform Lasanble ki nou'n fini ganny envite pour *join* sa *protocole* e i en travay ki tre byento pour ganny

mete devan *Cabinet* pour donn sa laprouvasyon.

E si tou keksoz i al byen disi la mon pe ekspekte ki probableman avan sa lannen i fini nou pou'n fini sa prosesis aksesyon. E ki sa pour anmennen pour nou? I pour anmenn sipor dan diferan domenn byensir avek bann diferan akter e bann lezot pei, pour nou kapab donn sipor sirtou nou konteks legal lokal, *both from* en pwennvi legal an term rol ki *Attorney Zeneral* pour zwe pour fer *legal finish* lo bann *case*. Me osi an sa ki konsern konpetans pour nou bann *Law Enforcement Agencies* ki pour enterakte avek bann provizyon sa Lalwa.

Wi Sesel i annan en *Cybercrime Unit*, me selman i annan en bon pe travay ki bezwen ganny fer pour fer sa *unit* vin alaoter, sa ki nou santi i devret ete pour li fer lenplimantasyon konplet sa Lalwa an egzistan. I enportan pour fer Lasanble konpran ki i annan 2 konteks ki nou pe koz lo la ler nou pe koz lo size *cybersecurity* e *cybercrime*.

I annan son konteks si oule *cybersecurity* from perspektiv sivilyen e son rol an sa ki konsern *Law Enforcement Agencies*. Fodre pa ki i annan en *crossover* pou sorti sivilyen

pou al lo *enforcement* akòz rol en antite sivilyen parey *DICT* an sa ki konsern *cybersecurity* malgre ki son konpetans i ase o nivo, i pa menm rol ki en *Law Enforcement Agency* i bezwen zwe.

Alors nou bezwen war fason pour nou transfer konpetans, osi *replicate* bann bon pratik e resours ki nesese pour fer ki sa *Cybercrime Unit* dan Lapolis i ava annan bann resours nesese pour li kapab delivre lo son travay ki bezwen fer.

Madanm Speaker i annan plizyer kestyon ki'n ganny souleve otour deba dan sa *Bill* e mon pour sey adres sa bann kestyon, dan en fason *as comprehensive* ki mon kapab fer li pour ki Manm i ava konpran enn pti pe si oule en pe difikilte ki asosye avek sa size e dinamiz ki asosye avek sa size.

Premyerman i annan sa size *deepfake AI* ki'n ganny souleve e mon bezwen dir ki i annan la fodre nou pran nou konpran, par egzantp si en *AI* i ganny servi pour sey atak en sistenm sa provizyon i deza ganny kouver anba Lalwa akòz la i pe fer lenterferans avek en sistenm nimerik avek en *digital system*.

Savedir a sa moman ki sa *AI* i ganny servi pour li fer sa

kalite aktivite, sa dimoun ki'n fer *design* sa *AI* si ou kapab idantifye li, i pe komet en lofans.

So sa in deza vin en lofans, pour ou fer en *policing of AI* li menm. Eski i realistikman posib *given fluidity of the technology*? I annan pei pe travay lo la i annan pe i pe sey met an plas menm en departman pour *AI*, i annan pei in met en Minister pour *AI*, mon krwar se sa lentansyon en ziridiksyon parey Sesel demen. Akòz? Akòz zisteman Sesel nou annan serten fakter risk asosye avek nou ziridiksyon par egzantp nou en pei ki ofer bann prodwi dan sekter *offshore*.

E la kot ou kapab vwar mon'n tann Onorab Loze mansyonnn *virtual assets*, byensir sa i en landrwa kot ou kapab vwar *usage of AI* dan bann sirkonstans kot ou annan bann *DocChain technology as well* ki kapab kree en *issue* pour nou ziridiksyon lokal.

Now baze lo sa ki bann *expert* pe dir lemoman ki en dimoun i servi *AI* pour li antre oubyen alter en portre oubyen en video, oubyen enterfer avek en data sa i vin en lofans. Savedir par egzantp parey Onorab Woodcock ti mansyonnen i ti annan sa *AI* ki ti pe fer mwan danse, e in fer

mwan dans ase byen mon krwar.

Selman lemoman ki sa dimoun i enterfer avek sa data kit sa portre, *then* i pe komet en lofans. *Now* mon pa pour al tay deryer en dimoun ki'n fer en sa pour fer mwan danse me selman sa i son konteks me i kapab i ti'n kapab fer aliterasyon pou en lot keksoz, pour kwa pa demen en dimoun i kapab fer en *AI* ki fer Onorab Georges danse ou konnen tousala i posib e bann keksoz ki kapab arive akòz zisteman teknolozi i ganny servi dan diferan fason, e Onorab Georges i apresye sa bokou.

Pour al pli lwen en dimoun i kapab servi *AI* pour *generate* bann portre ou bann video ki donn lenpresyon ki en dimoun pe fer en aktivite ki ilegal.

E sa osi i danzere akòz parfwa pour *distinguished between the fake and the real* i kapab difisil se pour sa rezon ki teknolozi ki pe ganny avanse sa i pour ganny konsidere koman en *forgery* dan li menm. Savedir i pour deza ganny pran koman en lot krim anba en lot provizyon legal. Me selman pour ou kapab dir ou pe *tackle* sa *AI* li menm, i pour annan en pe difikilte pour ou kapab fer li.

I osi annan son laspe kot dimoun i fer *deepfake* e la i fer

krwar poudir i servi sa dan sekter – dan en domenn pour ganny akse avek ban data finansyel sa osi i *evolve* avek sa ki ou apel *computer related fraud*.

So a okenn moman ki sa teknolozi i ganny servi sa krim ki sa teknolozi i ede fer i vin en krim, konmsi i annan e krim, i annan en prosedir legal pour *deal* avek me sa ki pe arive ek sa Lalwa se ki sa Lalwa pe fer sir ki ou annan en tol adisyonnel pour fer fas avek sa bann sityasyon.

En lot pwèn ki'n souleve se ki, ki lapros nou pou servi? Byensir ki napa okenn Lalwa ki pour kapab kouver totalman tou laspe teknolozi me nou toultan bezwen kontinyen si oule *upgrade* e *evolve* lo lafason ki nou Lalwa i *deal* avek bann sityasyon ki bezwen fer fas avek.

Nou menm kapab entrodwir regilasyon e mon krwar se sa ki Langleter pe sey fer ozordi, ler mon dir sey fer akòz zot osi zot in war poudir i annan bann difikilte ki asosye avek met an plas bann striktir legal ki nesesser.

Onorab Henrie mersi pour ou lentervansyon. Ou'n koz lo bann sipor pour bann viktim avek – bann viktim *cybercrime*. Parey zot a note nou ti pas sa

Lalwa *Mental Health Care Agency* e nou'n vwar poudir dan son fason konpreansiv pour adres sa size mantal i annan bann depresyon ki asosye avek.

Akoz plizyer fwa ou vwar i annan dimoun in dir ou in perdi son larzan e menm *call* bann MNAs e mon asire i annan zot ki'n ganny *call* kot en dimoun in fer li pey en keksoz *online* i pa'n zanmen vini, oubyen in al *click* lo en keksoz ki'n antre dan son kont labank ki'n pran son larzan eksetera.

E se pour sa rezon ki bann labank i entrodwir bann mezir sekirite, par egzanp i annan sa *code* ki ou ganny anvoye, avan ki ou fer en tranzaksyon, tousala i bann keksoz ki ganny fer me - e se la kot nou, nou bezwen konpran en keksoz Sesel, se ki i annan en kote psikolojik asosye avek *cybercrime* ki fer parfwa mon pa pou dir Seselwa i vin *prone* to sa.

Me nou bezwen konsider son laspe psikolojik e mon pour al ladan dan enn pti pe plis detay apre ki met nou a risk parfwa dan lafason ki nou, nou servi teknolozi e *allow* dimoun pour ganny akse avek nou lenformasyon oubyen avek nou bann *devices*, oubyen avek lezot keksoz ki konsern nou

lenformasyon personnel ouswa finansyel.

I enportan dan sa ki ou'n dir Onorab, i annan bann lezot lenstitisyon ki kapab ganny kree, me selman en pwen ki ou'n fer ki en pwen pertinan, ou konnen par egzanp si i konsern en sityasyon kot i konsern en labank, kot en dimoun i annan son depozit dan labank, nou konnen poudir bann labank i sipoze met an plas bann striktir pour protez ou koman endividi ki met ou larzan ek li e anba *Financial Institution Act* e Kod Regilatwar Labank Santral i annan en lasirans ki bezwen ganny donner, lo lapar bann labank pour asire ki zot annan an plas en sistenm pour protez zot lenformasyon.

Souvandfwa ou pour war poudir bann labank in investir konsiderableman dan zot bann sistenm zisteman pour protez aköz dek koman en labank i *subject to* en latak son repitasyon i tonbe. Be danze avek sa e kot Lasanble i devret pran konsyans se ki repitasyon sa labank i osi enkli repitasyon Sesel koman en ziridiksyon e se pour sa rezon ki toultan nou bezwen reste azour avek bann mezir ki pe ganny pran pour protez lenformasyon e data e anpes li vin size bann *cyber-*

attack e ki apre i vin komisyon en *cybercrime* dan li menm.

Pwen kardinal dan tousala e mon swete ki Lepep Seselwa i konpran sa byen, fodre ou koman sa endividi ou pran ou responsabilite premyerman. Ou bezwen regarde premyerman si en prens ki reste *Nigeria* pe ekrir pe dir ou anvoy tel kantite larzan oubyen pe dir anvoy ou kont labank, oubyen pe demann ou serten lenformasyon ou bezwen pa volonterman donn ou bann lenformasyon ki met ou a risk.

I enportan sa, aköz *there's no such things* aköz mon krwar i annan Manm ki'n koz lo lotri ki'n koz lo ganny larzan eksetera, ou bezwen *avoid* fer sa bann sityasyon. E tousala i bann konportman si oule bann *online behaviour* ki nou menm nou, nou bezwen fer en travay e mon krwar i annan Manm ki'n koz lo nou neseseite pour nou kapab met an plas bann striktir ki permet nou reponn a donn ledikasyon e sansibiliz dimoun lo lenpak e risk sa bann keksoz.

Souvandfwa pour bann dimoun ki pa'n enterakte avek teknolozi pour en kantite letan zot ki vin *a risk* sa bann keksoz e se sa kot apre i koz, i koz en kantite langwas pour sa bann dimoun e zot bezwen sa sipor.

Madanm Speaker in osi annan sa size kot nou'n koz lo sa *Unit Cybercrime* dan lapolis e mon'n komans avek sa, zisteman pour montre lentansyon nou Gouvernman pour ranforsi sa *unit* e donn li bann konpetans neseseite e resours neseseite pour li zwa sa rol koman en *Cybercrime Unit* dan lapolis.

I annan en kantite reform ki bezwen ganny anmennen, striktirelman pour etabli konpetans pa zis striktirel me osi konpetans lo en pwennvi *human resource capacity* pour fer sir ki lapolis i kapab zwa sa rol ki i bezwen zwa.

I annan bonn volonte lo lapar lapolis, i annan bonn volonte lo lapar bann dimoun ki travay dan sa sekter, me sa ki zot bezwen se ki zot bezwen sipor e lankadremman neseseite pour ki sa i kapab materyalize.

In annan sa kestyon diskisyon avek bann platform ki mon krwar Onorab Henrie menm ki'n *raise, being part of the Budapest Convention would help get evidence on this platform*.

Definitivman se sa lesansyel ki nou le fer, parey ozordi *FIU* i form par the *Egmont Group*, ki nou konnen ki se *ESAAMLG* i vin fer bann *review* lo en *FIU*, sa rezo i permet ou

kapab ganny akse e lenformasyon dan lezot ziridiksyon me i annan en eleman resiprosite asosye avek sa.

Koman en pei fodre nou osi ler nou ganny en demann pour lenformasyon fodre nou kapab donner e mon kapab alert Lasanble poudir nou annan konsern ozordi vizavi kapasite Sesel pour reponn a bann *mutual legal assistant request*, e i annan bokou ki pa ankor ganny reponn.

E sa nou bezwen *tackle*, nou bezwen *deal* avek, si i en problem striktirel kot *Attorney General* oubyen si i en problem mank kapasite kot *Attorney General* mon pa konnen.

Solman i pour bezwen ganny adrese aköz risk ki sa i anmennen pour de-regilasyon Sesel *from* perspektiv *correspondence banking* savedir i dir ou be ou ziridiksyon pa kapab onor bann lobligasyon ki nou'n mete dan bann *framework* legal.

Alors nou pa kapab ankouraz nou bann labank pour kontinyen annan en relasyon ek ou bann labank aköz bann risk ki sa i kapab poze ler nou pe rod lenformasyon, sa i en keksoz ki nou, nou bezwen kapab konsidere.

Travay ki'n ganny fer resaman mon konnen i annan en tim finans ki'n koz lo *grey listing Seychelles* tou resaman e nou'n sorti lo sa *grey list* nou pa ti a kontan retournen apre ki nou'n fer tou sa travay ki nou'n fer, e lefe ki Lasanble li menm, 7enm Lasanble in pas plizyer Prozedlwa zisteman avan lafen lannen pour nou sipoze siport sa mezir pour anpese ki Sesel i ganny *degeneralize*.

Onorab Loze ou pwen lo sa *Budapest Convention* e son striktir e travay ki nou'n fer i enportan e mon krwar le pwen ki ou'n fer se ki nou, nou bezwen *try* nou *best* pour nou toulta *meet* bann *requirements*, malgre ki nou pa pour zanmen fer li.

Mon krwar Onorab ou konpran sa tre byen, ki *the goalpost* i pa nou ki *set*, *the goalpost* i ganny set an deor aköz i annan bann resours e kapasite ki petet nou napa. Me selman annou pa ser nou lekor *short* pour krwar nou napa dan Sesel kapasite teknik pour nou fer serten keksoz.

Sa ki mon'n remarke par egzant kot *DICT* nou annan *programmers* nou annan dimoun, nou annan Seselwa ki kapab travay dan sa domenn, e ki kapab kree si oule bann baz e bann fondasyon pour nou

annan sa striktir nimerik ki nou bezwen annan me sa ki zot bezwen se sa sipor me osi nou bezwen ankouraz *training* e davantaz ankouraz bann zenn Seselwa pour pran en karyer dan sa domenn.

E byensir demen sa i pour reste enn bann landrwa enn bann *avenues* kot nou kapab ganny bann zenn pour investir. Bann Manm in koz lo bann lezot gap legal ki egziste me mon krwar sa nou pour adrese ler mon koz lo Lalwa an zeneral.

An sa ki konsern ledikasyon pour lasosyete, wi i nesese pour annan sa ledikasyon pour lasosyete aköz lesansyel ki nou bezwen fer se ki fer sir poudir tou dimoun i konpran ki bann risk ki asosye avek sa.

E sa la i anmenn mwan pour koz zisteman dan bann serten provizyon dan sa Lalwa ki bann Manm in tous lo la, ki mon krwar zot in war i ase sansib e ki zot bezwen met port latansyon lo la aköz i nesese.

Par egzanp Onorab Hoareau ou'n *raise* sa konsern lo so size, '*knowingly and intentionally*', mon krwar nou bezwen regard son terminoloji *from* en pwennvi legal osi *as well* aköz i bezwen annan en lentansyon ki sa dimoun pe fer sa.

Me i annan en largiman ki'n ganny avanse si sa i de dimoun ki anba laz. Ki pa konnen ki zot pe fer zot in fer sa. Se sa kot i arive si ou ti pour kriminaliz tou lede kote, *then* lekel ki pour responsab pour sa zanfann anba laz ki'n deside partaz son portre oubyen sa *video, it will be the parent no?* So ou bezwen fer sir dan sa prosesis kriminalizasyon ou regard ki lenpak i pour annan e ki fason ou pour kapab anmenn en finisyon legal ler sa sityasyon i le souleve kot ou'n war sa.

Me ki sa i bezwen anpese? I bezwen anpese parey egzanp ki si par egzanp Onorab Arissol i resevwar sa bann zimaz Onorab Arissol i kontinyen partaz sa bann zimaz ek lezot dimoun. E sa lot dimoun ki gannye i partaze ek lezot dimoun, i partaze ek lezot dimoun i fer propagasyon sa bann zimaz oubyen en lot dimoun i resevwar en video e propaz li.

Mon krwar sa ki nou pe sey fer la, sa ki nou pe sey protez lasosyete kont son lekor, *as difficult as that can be*, sey protez lasosyete kont son lekor si zot konpran sa byen i montre ou poudir nou annan en gro problem dan nou pei sirtou lafason ki nou kiltir se ki - *for*

lack of a better word, nou kontan donn nouvel me pa tou nouvel ki bon nouvel pour donner, se sa ki sa Lalwa pe dir ou serten nouvel plito ou pa donner akòz i en lofans pour fer li.

E si nou regard bann gam anba sa seksyon 2 la, kot nou pe koz ki prodwi *child pornography*, ki ofer or fer *available child pornography* ki *distribute* ou *transmit* atraver *computer system*, i *procure* i al aste, i *possess* sa *child pornography*, oubyen i sey *access child pornography through a computer system* i pour komet en lofans.

Savedir i tou depan lo ou koman en endividi an sa ki konsern ou *pattern behaviour* ki ou fer pour anpese ki ou pe fer en lofans?

E souvandfwa taler mon pour al dan, mon pour al dan son kote enn pti pe pli psikolojik nou a konpran akòz i neser pour nou annan bann provizyon legal ki fer keksoz dan sa fason.

I annan bann lezot pwen ki'n ganny souleve par egzanp Onorab Lemiel *LGB* mersi pour ou bann pwen. I kler wi poudir i annan plizyer konponan bann diferan zouti legal, ki nou annan ozordi ki fer ki sa Lalwa i pa egziste li tousel me i form

parti en group pli larz bann Lalwa e mon krwar bann Manm in konpran sa tre byen e ki sa i form parti en kote bann keksoz ki nou pe fer.

Onorab Sultan mon apresye ou sipor pour sa Prozedlwa e mon konnen poudir enn bann keksoz ki parey koman *MNA* ou konsernen avek se ki, ki lenpak sa i annan lo lasosyete sirtou bann ki pli vilnerab?

E ki fason teknoloji i kapab afekte bann dimoun ki pli vilnerab? E ki mannyer nou, nou bezwen ede pour asire ki i annan bann mezir ki protez bann dimoun ki pli vilnerab? Ki swa zanfàn ki swa bann dimoun aze an sa ki konsern zot lenformasyon finansyel, pour anpese ki en dimoun i sey akse zot bann lenformasyon oubyen propaz lenformasyon personnel en dimoun san ki sa dimoun i donn son konsantman.

Dan mon lanaliz i en keksoz ki pa sitan fasil, me selman nou bezwen met an plas striktir pour nou fer li. As *it stands* la *DICT* wi i kapab konnen si ou pe sey fer akse son sistenm. *DICT* i annan sa kapasite pour li konnen e mon krwar nou *deal* avek – (konbyen *threats* par?) - *at least* 25-88

threats lo sistenm Gouvernman par zour.

So dan en lazournen nou kapab, dan en semenn nou kapab konpran ki kantite *threats* ki nou sistenm i gannyen e ki kantite i pour gannyen e mon prezimen bann labank osi i resevwar bokou plis pandan lazournen e zot sistenm an plas i sipoze protez zot kont sa.

Onorab Aglae mon osi, mon apresye sipor ki ou'n donner pour sa Prozedlwa, i annan sa konsep *revenge pornography*, kot mon'n war i annan Manm ki'n koz lo la, kot apre ki e mon krwar Onorab Henrie in koz lo la kot apre ki sa de dimoun in separe sa dimoun i pran son lenformasyon nimerik i al partaze eksetera.

Anba sa Lalwa sa i vin en lofans prezan, aköz si sa dimoun i ganny war koupab pe fer sa *then* i vin en lofans. So i pour dekouraz, vin koman en *deterrent* okenn dimoun pour deside pran sa - aköz a sa moman ki sa bann dimoun ti pe annan lekspresyon sa bann lenformasyon i ti en lenformasyon personnel e entim pour sa de dimoun.

E pa ti pour tou lezot dimoun e a sa moman ki en lot dimoun i deside swazir pou partaz li e i annan menm ka kot

dimoun pe aranz en *computer* i war sa lo la i kapab tire osi e si i fer sa i tire e i al partaze, sa osi i vin en lofans.

So nou pe sey si oule met sa lankadreman pour sey met en fe otour tou keksoz me parey zot konnen avek lavansman teknolozi i parey delo ler ou pe bar li. I pour toultan rod en fason pour li pase ou toultan bezwen rod en *channel* pour met li ladan pour ki i pas dan en *channel* kot ou kapab kontrole dan plas ki al tonbe e i vin en lavalas kot i al detri lezot keksoz pli devan.

Madanm Speaker i annan lezot Manm ki'n koz lo sa Lalwa, i annan Onorab Arissol osi ki'n koz lo sa Lalwa, e Onorab Woodcock ou'n eksprim ti annan en konsern e pour ekout *right of reply* mon swete ki apre *right of reply* ou vot an faver sa Prozedlwa.

Me sa ki Onorab Arissol in dir, i al ver lokalman sa ki dimoun pe santi, ler ou en paran e ou konnen ou konsyan pou dir risk ki annan avek sa ou bezwen konpran poudir data an sa ki konsern dan son diferan laform i en keksoz ki ou bezwen, ki ou bezwen toultan rod en fason pour proteze ou lenformasyon.

Lontan lenformasyon ti koumsa, dan en *file* ozordi

lenformasyon i lo sa masin e lontan ou ti bezwen en disk konmela ou pe *store* dan *cloud*, so pli ale teknolozi i kontinyen evolve pour permet nou vin pli *agile*, anmenn plis anmenn mwens papye, ozordi mon ankor enn pti pe *analogue* mon ankor mon vin *digital* mon'n vin ek en *file* ler mon'n vin avek en *computer*, probableman dan lefitir sa dimoun ki pour vini pour vin zis avek swa en *tablet*, swa en lot *gadget* ki pour annan en *screen* anler ki pour *project* tou keksoz.

Tousala i montre ou ki lavansman teknolozi i en bon keksoz. *But at the same time*, nou bezwen fer sir ki tou bon keksoz i kapab ganny servi pour son move kote.

Madanm Speaker, apre midi mon le dir ek Lasanble ki bann *cybercrime* i toultan *linked* avek *behaviour* imen. E sa i annan pou fer avek ou *cognition*, ou motivasyon.

E sa i donn nou – i met lenportans e lanfaz lo ki bann *law enforcement strategies* ki nou annan i bezwen *extend purely beyond* bann repons teknik ki nou bezwen dil avek *cybercrime*. E se pour sa rezon ki bokou Manm in met lanfaz lo *training* pour nou kad *law enforcement* dan sa konteks. Ok.

Ler nou regarde Madanm Speaker, baze lo lenformasyon ki mon annan, *ok, social engineering attacks* i *account for approximately* 98poursan bann lensidan kot i annan *phishing* oubyen *data breaches*.

Savedir i ganny - si ou le, i ganny inisye lo en baz sosyal e toultan i annan en konotasyon pou rod en lenformasyon pour swa annwi en dimoun, ouswa pou rod en gen personnel.

E sa ki kler se ki i annan osi en konteks psikolojik e manipilasyon psikolojik ki arive. Par egzanp, pou *convince* sa dimoun pou fer li fer sa ki i fer. Par egzanp enn bann keksoz ki mon'n kapab *come across* se ki *Jamaica* i annan en group dimoun ki asize e fer krwar avek bann dimoun otour lemonn ki zot in ganny en lotri.

E pour zot *access* sa lotri, zot annan telefonn, zot annan en sistenm an plas zot zis *call* sa bann dimoun ek – savedir si zot pe *call* zot oubyen zot pe *call over* 200, 300 a 500, menm a 5mil dimoun, e sak dimoun pe donn zot \$10. Zot pe fer – lo 5mil zot pe fer \$50mil.

E zot napa zis sa kalite aktivite ki zot pe fer. I annan en lot ki zot pe ofer sa dimoun en prodwi seve, i annan en lot ki zot pe fer sa dimoun en lot

zafer, i annan zot pe fer en lot zafer.

Me selman, tou sa bann keksoz la i ganny fer atraver en rezo nimerik e souvandfwa bann dimoun ki pli *prone* ek sa zot *allow* zot lekor pou ganny akse ek sa. Zot donn zot nimerò kont, zot donn zot bann detay *email*, zot donn tou sa bann keksoz.

Se pour sa rezon ki ou war sa size *spam email* in vini kot ou ganny demande pou partisip dan bann *workshop*, isi laba, isi laba. E i annan de lenstans Sesel kot dimoun ti krwar i pe al partisip dan *workshop*, fini pey son tiket ler i arive, ler i al get landrwa ki i pe al fer *workshop* i dan lakanpanny, napa personn, napa okenn landrwa i annan zis en pti – en pti *hut* lanmenm la, la.

So, foudre pa ki nou pran sa risk. E i annan menm dimoun dan Gouvènmàn ki sa in arive ek li dan lepase. So, *nobody* – napa personn ki ganny proteze.

Se pour sa rezon Madanm Speaker ki en lot domenn ki nou bezwen investir ladan se dan *forensic psychology*, akòz i pou zwe en rol kritik dan egzamin bann dimoun ki komet bann lofans. Akòz?

Zisteman, par egzanp parey Onorab Hoareau ou'n koz lo sa size pornografi bann

zanfan. So, i bezwen annan en analiz ki ganny fer lo *pattern behaviour* sa dimoun e etabli *whether* sa i zis en endividi oubyen i en rezo bann endividi ki pe *act* ansanm pour zot fer sa bann aktivite.

E souvandfwa ler i en endividi, ou kapab dil ek li, ou'n *tackle* sa problem be ler ou *tackle* sa problem e petet ti en rezo bann endividi. Sa rezo i kasyet, i pa manifeste son lekor pour en pe letan, apre i reaparet.

Nou koz lo en *case* 75 fyi, i pa zis 2 dimoun ki'n fer, bezwen annan lezot dimoun *involved*. So i pou kasyet son lekor pour en serten letan. Alors sa *threat* pa zanmen ale. Kekfwa in rod en lot fason pour li manifeste son lekor.

E se pour sa rezon ki nou, nou bezwen rod fason toultan pou analiz sa bann lenformasyon e met an plas bann striktir pour nou kapab analiz sa.

Lanfaz i lo ki kantite vilnerabilite sa dimoun i annan e *allow* son lekor pou ganny eksplwate. E sirtou bann ki pli zenn, zot pou ganny eksplwate se pour sa rezon sa 2 konponan sa Lalwa in ganny met an plas.

Akòz eksplwatasyon endividi pa vin zis atraver son eksplwatasyon fizik me osi lo en

pwennvi eksplwatasyon mantal, kot ou servi ou lavantaz mantal pour ou fer en dimoun fer en keksoz ki ou fer oubyen, kan i pa konnen, pou fer fors li pou fer en lot keksoz. E se pour sa rezon ki ou bezwen annan an plas bann striktir pou dil avek sa.

Alors, sa ki mon'n ganny dir e sa ki mon pe regarde. Mon dakor avek sa *statement "Integrating a Human-Centric Perspective"*. Rod en eleman imen pou konpran sa bann krim e pa regard zis *from* perspektiv teknolozi.

Nou bann teknisyen ki la i kapab asize avek en sistenm e regarde ki latak ki pe ganny fer lo sa sistenm. Be ou bezwen osi analiz sa dimoun ki pe fer sa latak ki son motivasyon.

E si son motivasyon i kapab en dimoun ki pe fer motivasyon pou detri sa sistenm. Savedir ou annan bann dimoun ki *anti-teknoloji*, ki pa oule ki en sistenm i vin nimerik.

Ou annan bann dimoun ki pe servi sa sistenm pou rod en gen finansyel. Ou annan en dimoun ki pe servi sa sistenm pou ganny akse ek lenformasyon pou al fer lezot keksoz avek.

Tousala ou bezwen annan en analiz konplet ki ganny fer

pour ou konpran sa dimoun. E se sa rezon aköz sa Lalwa ki devan nou ozordi i en Lalwa konpreansiv.

I en Lalwa konpreansiv aköz i bezwen kouver tou eleman. Me i pa pou ase dan li menm, aköz sa ki konpreansiv ozordi, pa pou konpreansiv sertenman demen an sa ki konsern *cybersecurity* oubyen *cybercrimes*. I pou toultan annan evolisyon e sa evolisyon pou anmenn nou pour nou bezwen demann ankor plis e pou rod plis keksoz.

Madanm Speaker, dan sa Lalwa nou'n vwar i annan plizyer eleman ki'n ganny enkorpoze pou zisteman fer bann sanzman *across* bann diferan seksyon e petet bann Manm pa'n tous lo la.

Par egzanp, enn bann konponan ki nou'n vwar i nesese e ki mon santi poudir ki nou bezwen koz lo la, se sa size otorizasyon ki en dimoun i bezwen annan pou annan akse avek en sistenm.

Tou sistenm, par egzanp, annou pran li senp, annou pran bann laport kot Lasanble ki mon war bann dimoun i bezwen met zot *thumbprint* oubyen met en kart. Ou bezwen annan lotorizasyon pou antre dan sa landrwa.

Si en dimoun i donn en lot dimoun akse pou antre dan sa laport ki napa sa *thumbprint*, *then in breach* sa lotorizasyon aköz sa dimoun napa sa akse. En sistenm nimerik i parey.

Si ou napa lotorizasyon pou donn sa dimoun akse ek sa sistenm, ou pa sipoze pe donn li akse ek sa sistenm. Sa in vin en krim prezan ler ou donn sa lotorizasyon ler ou donn sa akse san sa lotorizasyon.

E sa i fer tou dimoun *liable*. Par egzanp, sa dimoun ki'n donn ou permisyon pou donn sa lotorizasyon osi i vin *liable*. Savedir i pa pou en leskiz.

E ki sa Lalwa i annan en premiz enportan ladan, se ki linyorans – *ignorance of the Law will not be an excuse*. Savedir ler nou koz "*willfully*" and "*intentionally*", si ou pa ti konn Lalwa, pa vedir pou en leskiz si ou'n fer sa aksyon. Sa ki pe ganny dir se ki ou pa fer sa aksyon aköz i en aksyon kriminel ler ou fer li.

En lot pwen enportan se sa size *cyber harassment*. I annan dimoun avek lentansyon pou *coerce* en dimoun pou fer en keksoz, i *harass* en dimoun *online*. E i kontinyen *harass* li, i kontinyen *harass* li, i kontinyen *harass* li.

Bokou dimoun petet i kapab per pou raport sa aköz petet swa pozisyon sa dimoun. Oubyen sa dimoun son – ki kalite dimoun i ete. Or petet i pa menm parfwa pa konn sa dimoun.

Sa ki nou pe dir la par egzanp la se si ou anvoye oubyen delivre mesaz ki *visual otherwise, including sexual nature otherwise, me ki threaten e cause alarm e distress to any person*. Sa i *constitute* en krim.

So la nou pa pe protez zis zanfann nou pe protez tou dimoun ki kapab war li a en moman donnen i pe resevwar sa bann kalite latak oubyen sa bann kalite enterferans dan son lavi prive. Sa i protez *your right to privacy* ki ou annan anba nou Konstitisyon.

E sa i enportan, aköz bann Lalwa ki nou fer i bezwen al anliny avek bann prosedir ki nou annan dan nou Konstitisyon.

En lot eleman enportan se sa *replacement of section 15* ki nou'n fer ki petet bann Manm pa'n tous lo la. Se ki *cyberstalking* osi i vin en *issue*. Aköz i vin en *issue*?

Ozordi i annan diferan *platform* sosyal ki dimoun i servi pou prezant zot bann aktivite. I annan ki lo *TikTok*, i

annan ki lo *Instagram*. I annan ki lo *Facebook*, i annan ki servi *Snapchat*.

I annan plizyer bann *platform* ki ganny servi e sirtou par en kous nou sosyete ki pe devlope e pe konmans entegre teknolozi *as part of their everyday life*.

Ozordi i annan dimoun son telefonn i son *best friend*. Perdi son telefonn i en problem. E alors ler nou pe regarde sa ki nou'n fer – sa ki'n ganny fer dan seksyon 15 se ki pou swiv en dimoun *online*, vey son aktivite eksetera, eksetera, tousala i form par en aksyon ki kapab ganny *constitute* en krim si ou pe fer li avek en move lentansyon.

E sa lamannman i marye byen li, akòz i marye byen ek lamannman ki pou vini dan *Penal Code*. Ler nou'n retir karakteristik politik, nou tou nou vin egal. Tou dimoun i egal.

As it stands la, politisyen nou ganny en lot *layer of* proteksyon. E sa i pa byen dan konteks en sosyete tou dimoun i annan drwa egal devan Lalwa.

Alors ki i fer ki ler nou'n tir sa konotasyon politik pour - dan *Penal Code*, nou tou nou pou vin egal an relasyon avek en *cybercrime*.

Savedir, ki swa ou, ki swa en endividi la deor ki pa en

politisyen. Si en dimoun i *stalk* ou oubyen fer en bann aksyon malisye anver ou aktivite, i pou vin en krim si in komet en lofans anba sa Lalwa.

Madanm Speaker, mon krwar mon'n kouver bann pwen pertinan dan deba ki'n souleve. Sa ki mon le konklir avek se ki ozordi apre midi nou annan loportinite pour nou *vote* an faver en Prozedlwa ki annan lentansyon *improve* nou kad legal e fer keksoz pli byen.

E mon krwar sa ki nou devret fer konman – sa ki zot devret fer konman Lasanble se donn zot sipor e donn nou en *buy in* lo kote Gouvernman pour nou kapab *move* devan, al ede pou travay e ranforsi *Cybercrime Unit* lo nivo lapolis.

Travay lo ki mannyer nou kapab ganny sipor atraver gran Konvansyon *Budapest*. E trwazyenmman, rod fason pour nou *replicate* striktir oubyen transfer kapasite e *knowledge base* sorti kot *DICT* pou anmenn li kot lapolis.

Avek sa Madanm Speaker, mon remersi Lasanble pour son latansyon. Mon remersi ou pour letan ki ou'n donn mwan e mon swete ki mon kapab ganny sipor Lasanble an antye pour sa Prozedlwa ki devan nou ozordi. Mersi.

MADAM SPEAKER

Mersi Vis-Prezidan. In ariv ler prezan pour nou pran en *vote* lo merit. Tou bann ki aprouve ki...? Mersi. Mersi. Lo *vote* merit *Bill* i inanim. 32 *vote* pour. Nou ava prezan demann Clerk pou fer *Second Reading*.

MADAM CLERK

Mersi Madanm Speaker. “A *Bill for an Act to amend the Cybercrime and other Related Crimes Act, 2021*”. Mersi Madanm Speaker.

MADAM SPEAKER

Mersi. Nou ava aprezan al *Committee Stage*.

(*Committee Stage*)

MADAM CHAIR

Bon, mon vwar ki sa *Bill* i annan 27 *clauses* e mon pa'n resevwar okenn *notice from Scrutiny of Bills Committee* pour okenn *amendments* e okenn lamannman sorti kot okenn lezot Manm.

Nou ava alors pran *the Bill*. Nou ava komans avek *clauses 1 to clause 5*. E si i annan okenn *kestyon*, vi ki napa okenn amannman lo *clause 1 to clause 5*?

Si non, nou ava bouze nou ava al lo *clause 6 to clause 10 of*

the Bill. Ok, nou napa okenn *kestyon* oubyen amannman.

Nou ava pran en *vote* alor ki *clause 1 to clause 10 form part of this Bill*. Tou bann Manm ki annakor? Okenn Manm ki kont? Non.

Mersi. Lo *kestyon* ki *clause 1 to clause 10 forms part of the Bill*, nou annan 22 ki'n *vote* pour, avek 10 abstansyon.

Nou ava prezan bouz lo *clause 11 to 20*. Si nou napa okenn *kestyon*, e parey mon pe vwar nou napa okenn amannman.

Nou ava pran en *vote that clauses 11 to 20 form part of this Bill*. Tou bann Manm ki annakor? Okenn Manm ki kont? Mersi.

Mersi. Lo *kestyon* ki *clause 11 to 20 forms part of the Bill*, nou annan 21 *vote* pour e 11 ki'n *abstain*.

E nou a pran dernyen – bann dernyen *clauses* ki *clause 21 to clause 27*. Okenn *kestyon*? Okenn amannman, non?

Nou ava aprezan pran en *vote that clauses 21 to clause 27 form part of this Bill*. Tou Manm ki annakor? Mersi. Okenn Manm ki kont? Mersi.

Lo *kestyon* ki *clause 21 to 27 form part of the Bill*, nou annan 22 ki'n *vote* pour avek 10 ki'n *abstain*.

Vi ki mon pa pe vwar okenn kestyon, okenn lezot komanter, nou ava sorti dan *Committee Stage* e nou a *reconvene into Assembly*.

(End of Committee Stage)

MADAM SPEAKER

Si mon kapab prezan ganny en Mosyon *for Third Reading*. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, mon ti a demande ki anba *Order 76(1)* mon demande ki sa *Bill* i ganny lir pour en *Trwazyenm Fwa*. Mersi.

MADAM SPEAKER

Okenn Manm ki segonde? Onorab Gill.

HON CHURCHILL GILL

Mersi Madanm Speaker. Mosyon i ganny segonde. Mersi.

MADAM SPEAKER

Nou ava pran en *vote* lo *Third Reading of the Bill*. Tou bann Manm ki annakor? Mersi. Okenn Manm ki kont?

Alors, *on the Third Reading of the Bill* vote i inanim.

Alors, *Cybercrime and other Related Crimes (Amendment) Bill, 2025* in pase.

Nou ava prezan pran en *break* ziska – anr, sorry. Nou ava pran *Third Reading* silvouple, Clerk.

MADAM CLERK

Mersi Madanm Speaker. “*This Act may be cited as the Cybercrimes and Other Related Crimes (Amendment) Act, 2025.*” Mersi Madanm Speaker.

MADAM CLERK

Mersi. Nou ava pran en *break* ziska 3er en kar.

(BREAK)

MADAM SPEAKER

Bon nou ava, mon a dir bonn apre midi tou dimoun ankore enn fwa. Nou pou aprezan bouz lo lot *item* ki *Supplementary Appropriation Bill, 2025*. Nou pou bezwen en Mosyon. Onorab Lemiel.

HON SYLVANNE LEMIEL

Mersi Madanm Speaker. Bonn apre midi Madanm Speaker, ek tou dimoun a lekout. Madanm Speaker, anba *Order 91(1)* mon demann ou permisyon pour mwan *move* pou sispann *Order 69(1)* ki pou permet *Bill Supplementary Appropriation Bill, 2025*, i ganny lir en *Dezyenm Fwa* malgre ki sa

peryod 7 zour depi son *First Reading* pa ankor pase. Mersi.

MADAM SPEAKER

Onorab, zis en- mon krwar i *Order* 97(1).

HON SYLVANNE LEMIEL

97(1).

MADAM SPEAKER

Wi, *yeah*. Wi, *ok*, *ok*. Okenn Manm ki segonde? Onorab Gill.

HON CHURCHILL GILL

Mersi Madanm Speaker. *Motion seconded*.

MADAM SPEAKER

Mersi. Nou annan okenn- mon ava pran en vot lo Mosyon. Tou Manm ki agree? Okenn Manm ki kont? Mersi.

Lo vot pou *suspend Order* 69(1) nou alors i annan 17 Manm ki'n vot pour, e 15 ki'n *abstain*. Nou pou alors, aprean bouz lo *Second Reading Supplementary Appropriation Bill*. Nou ava demann *secretariat* pou fer Vis-Prezidan antre, mon mazine i avek *PS Finans*, wi.

Bonn apre midi. Bonn apre midi Minis. Bonn apre midi *P.S.* Bon mon ava demann en Mosyon pour *Second Reading*. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, anba *Order* 69(2) mon *move* ki *Supplementary Appropriation Bill*, 2025 i ganny lir en Dezyenm Fwa. Mersi.

MADAM SPEAKER

Mersi Onorab Gill.

HON CHURCHILL GILL

Mersi Madanm Speaker. Bonn apre midi Minis ek *PS. Motion seconded*.

MADAM SPEAKER

Mersi. Mon ava demann Minis pou fer en *brief presentation* lo *Bill*.

MINISTER PIERRE LAPORTE

Madanm Speaker. *Leader* Lopoziyon. *Leader* Zafer Gouvernman, tou Manm Lasanble Nasyonal, tou dimoun ki ek nou bonn apre midi.

Madanm Speaker, annakor avek Lartik 154(7) nou Konstitisyon mon pe prezant en Bidze Siplemanter pour lannen 2024, pour laprouvasyon Lasanble Nasyonal.

Madanm Speaker, Mardi le 08 Oktob 2024, Lasanble ti aprouv rezolisyon pour en Bidze Siplemanter pour en sonm 473,100,693.87 sou. Sa rezolisyon ti osi fer provizyon

pour en koupir bidzeter pour en valer 453, 320,193.15 sou.

Baze lo lodit ki kont Gouvernman pour lannen 2024 ki Oditer Zeneral in konplete ti napa okenn depans adisyonnèl ki mon'n kapab pou rekouver anba sa sonm ki ti ganny aprouve parey mon'n dir an Oktob 2024.

Alors Madanm Speaker, se anba Lartik 154(7) nou Konstitisyon ki mon pe prezant sa Prozedlwa pour en *Supplementary Appropriation* devan Lasanble Nasyonal ozordi ki pour en sonm 473,100,693.87 sou.

Madanm Speaker, mon pou aprezan donn en pe detay ki manyer sa larzan ki Lasanble ti aprouve ti ganny depanse. Dabor anba saler en total 8.5 milyon adisyonnèl, sa larzan in al ver serten laliny bidzeter swivan.

Departman Ladefans, en sonm R4milyon ki ti al anver depans relye avek peyman *gratwite, e osi pou kouver scheme* bann zofisye ki dan *Brass Band*.

Departman Zidisyer, en sonm R765 mil pou kouver depozisyon adisyonnèl ki ti ganny rekrite an 2024 e osi defisit anba provizyon trezyenm mwan saler.

Minister Lapes, R3.8 milyon ki ti relye avek transfer lekòl Sant Maritim anba sa Minister.

Parkont dan saler ti osi annan en sonm R46 milyon ki ganny koupe retar dan rekritman. Anba sa siplemantèr en alokasyon 110milyon i ganny transfer dan byen e servis, *goods and services* parey nou konnen.

Bann pli gro sonm dan sa alokasyon i konm swit Biro Lofis Prezidan, R6.5 bilyon pou kouver depans adisyonnèl dan kou loperasyon sa lofis.

Departman Ladefans, en sonm R27.5 milyon pou kouver depans relye avek reparasyon bato e avyon donner militèr. Sa sonm in osi al anver depans adisyonnèl lo karbiran e akizisyon transpor.

Departman Zidisyer, R2.1 milyon ki'n prensipalman kouver lasirans medikal pour bann Ziz. Lasanble Nasyonal, en sonm 878 mil pou kouver depans relye avek souskripsyon *Microsoft Office 365*.

Minister Lapes, en sonm R20.6 milyon pou re alokasyon bidze relye avek transfer lekòl Sant Maritim, e osi aktyel depans apre ki Proze *SWIOFish*, en proze avek Labank Mondyal in konplete anba Departman *Blue Economy*.

Minister Zafer Entern, 1.3 milyon in al anver Departman Prizon pou akizisyon transpor adisyonnèl, osi R3 milyon anba Departman Lapolis ki'n osi al anver transpor adisyonnèl.

E R16 milyon ki'n al anba Departman Risk e Dezas, ki kouver bann depans relye avek mezir prevansyon ant bann dega e lavalas.

Minister Ledikasyon R1.6 milyon ki al anver depans pou lwe lofis pou seksyon plizyer *scholarship*. Minister Gouvernman Lokal, en sonm 2 milyon ki'n al anver bann proze *emergency* dan distrik.

Minister Lagrikiltir Sanzman Klima e Lanvironnman, anba Departman Lagrikiltir, en sonm R2.3 milyon ki'n kouver bann depans anba *livestock support*.

En sonm R2.8 milyon anba Departman Sanzman Klima e Lanvironnman, ki'n al anver depans adisyonnèl lye avek netwayaz larivyer ek lanmar.

En sonm R1.5 milyon ti al anver peyman adisyonnèl anba *Daycare Scheme*, ki ganny administre par lenstiti bann pti zanfan *IECD*.

Lotorite Kalifikasyon Sesel, R2.1 milyon ki'n prensipalman al anver depans

relye avek zwe pardon, avek lwe lofis pour sa lotorite.

Lotorite Plan Sesel, R1.4 milyon ki'n kouver depans relye avek nouvo transpor, partasyon adisyonnèl, netwayaz dan zot bann dokiman ki dan arshiv, e osi peyman pour konsiltan ki'n ed zot avek revwar proze Prozedlwa bann kontrakter.

En sonm R1.2 milyon in al anver akizisyon de *pickup* anba SMSA. Lazans Transpor lo Later SLTA, en sonm R6.4 milyon koman sipor adisyonnèl pou kouver depans relye avek travay pou antretenir semen piblik.

Lazans Swen Lasante, en sonm R5.8 milyon provizyon adisyonnèl pou kouver logmantasyon dan kou elektrisite.

Konsej Nasyonal pour bann Zanfan NCC, en sonm R440 mil ki'n ganny servi pou aste en nouvo transpor, e pou siport loperasyon sa Konsej.

Lenstiti Nasyonal Agrikilter, pardon Lenstiti Nasyonal Kiltir Leritaz e Lar Sesel, R3.3 milyon pou kouver depans adisyonnèl anba elektrisite, e osi depans pou lwe lofis pou Lakademi Kreol.

Parkont Madanm Speaker, i osi annan en sonm R19.8 milyon ki'n ganny koupe anba sa kategori depans sa ti pli zou mwen bann *savings*

anba plizyer Minister, Departman, e Lazans.

Dan Proze Kapital, en sonm R318.4 milyon ti ganny proporsyonnen ladan pli gro sonm R281.2 milyon ti al anver Minister Lakaz ek Lakaz, pour Prensipal Proze Reklanmasyon.

Bann lezot alokasyon anba bann depans kapital in al anver Departman Prizon, R8.8 milyon ki'n ganny servi anver Proze *Maximum Security Prison, Medium to Low Risk Accommodation*, e Sant Rimann.

Lazans Zesyon Lanbelisman e Salte, R3.7 milyon ki'n al anba Proze *Solid Waste Management*. E finalman Madanm Speaker, en sonm R23.4 bilyon anba SBC anba konponan don pour nouvo SBC House ki ti konplete an 2024.

I byen note osi Madanm Speaker, ki anba sa menm kategori en total R352.5 milyon ti ganny koupe pour bann rezon tel ki retar dan lenplimantasyon proze, rediksyon dan to lesanz pandan revy milye lannen 2024, konpare avek to lesans ki ti'n ganny servi letan Bidze ti pe ganny prepare.

Madanm Speaker, en sonm R2 milyon ti ganny koupe anba pansyon, anba kategori Sibvansyon pour Lantrepriz Piblik en sonm R8.3 milyon pe

ganny rekomande koman bidze adisyonnèl, e ladan i annan de konponan prensipal;

Dabor, R5 milyon pe ganny rekomande pou SPTC ki pou kouver depans anver sibvansyon ki Gouvernman in met an plas pou kouver *free* bis bann pansyoner, bann ki annan dezabilite ek *workers special scheme*. I osi annan en alokasyon R3.3 milyon ki'n ganny fer anver depans operasyonnel pour *Petro Seychelles*.

Madanm Speaker, finalman en sonm R26.1 milyon adisyonnèl anba kategori kontribisyon pour Lorganizasyon Enternasyonal, spesifikman pour peyman adisyonnèl ki'n ganny *allocated* pour Sesel anba Labank Fon Afriken pour Devlopman.

Madanm Speaker, pandan sa de dernyen lannen Minister Finans in travay en pe pli pros avek bann Minister, Departman, e Lazans pou amelyor lafason ki lenformasyon lo sa ki konserne bann don ki vin dan form bann byen in osi ganny anmase.

Se pour sa rezon ki an 2024, nou'n vwar ki apre rapor Oditer Zeneral i napa okenn depans an plis anba sa kategori.

Lo sa *note* Madanm Speaker, avek sa prezantasyon mon demann laprouvasyon Lasanble Nasyonal pour sa Prozedlwa ki kouver Bidze Siplemanter pour lannen 2024 koman in ganny odite par Oditer Zeneral. Mersi Madanm Speaker.

MADAM SPEAKER

Mersi Minis. Bon vi ki deba lo sa Bidze Siplemanter ti ganny fer an Oktob 2024, letan Lasanble ti pran rezolisyon nou pou aprezan pou napa deba lo sa *Second Reading*, e nou ava prezan pran en *vote* lo *Bill*. Tou bann ki an faver? Eskiz mwan *sorry*. *Thank you*. Eskize Onorab Lemiel.

HON SYLVANNE LEMIEL

Mersi Madanm Speaker. Mon ti pe regarde si nou pa pou al *suspend* pour nou sot lo Staz Komite - sot Staz Komite, non?

MADAM SPEAKER

Nou a fer sa avan apre nou ava *suspend Committee Stage*.

HON SYLVANNE LEMIEL

Mersi Madanm Speaker. Madanm Speaker, anba *Order* (97)(1) mon demann ou permisyon pour mwan *move* pour sispann *Order* 70 ziska 75 pou sot Staz Komite. Mersi.

MADAM SPEAKER

Ok. Mersi, si nou kapab pran en *vote* lo *Bill*. Eskize, *sorry*. Onorab Gill, *second-*

HON CHURCHILL GILL

Mersi Madanm Speaker. *Motion seconded*.

MADAM SPEAKER

Eski nou annan konsansis Lasanble pou sa Mosyon ki fek ganny prezante? Si nou kapab ganny en *show of hands*, silvouple? Mersi. Okenn ki kont? Mersi.

Lo Mosyon pour *nou skip Committee Stage* i annan 17 Manm ki'n *vote* pour, e nou annan 15 ki'n *abstain*. Nou ava prezan pran en *vote* lo merit *Bill*.

Tou bann ki an faver? Mersi. Okenn Manm ki kont? Mersi. Nou annan nou 17 Manm ki'n *vote* pour avek 15 ki'n *abstain*. Clerk si nou kapab fer *Second Reading*, silvouple.

MADAM CLERK

Mersi Madanm Speaker. A *Bill for an Act to provide for the purposes of a Supplementary Estimate approved by the National Assembly*. Mersi Madanm Speaker.

MADAM SPEAKER

Mersi. nou ava prezan al lo *Third Reading*, si mon a ganny en *Motion for the Third Reading of the Bill*. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, “mon pe rod mon *Bill*” - en enstan Madanm Speaker, mon *Bill* in deside pour li disparet.

Mersi Madanm Speaker. Madanm Speaker, anba *Order* (76)(1) mon *move* ki *Supplementary Appropriation Bill, 2025* i ganny lir pour en Trwazyenm Fwa. Mersi.

MADAM SPEAKER

Mersi. Onorab Gill.

HON CHURCHILL GILL

Mersi Madanm Speaker. *Motion seconded.*

MADAM SPEAKER

Mersi nou ava prezan pran en vote lo *Third Reading of the Bill*. Tou bann Manm ki annakor? Mersi. Okenn Manm ki kont? Mersi. Alors lo *Formal Third Reading*, nou annan 17 Manm ki'n *vote* pour, e 15 ki'n *abstain*. Clerk, si ou kapab fer *Third Reading*, silvouple.

MADAM CLERK

Mersi Madanm Speaker. *This Act may be cited as the*

Supplementary Appropriation Act, 2025. Mersi Madanm Speaker.

MADAM SPEAKER

Mersi. Alors *Supplementary Appropriation Bill, 2025* – (*Bill No. 26 of 2025*) in pase. Nou pou aprezan *adjourn* ziska demen bomaten 9er.

(ADJOURNMENT)